


AHEPERI,

EKAPIITULU YOOPACERYA

 Nto ovaha ya—yaamukhaani...Kinoona wira khiivo hat'etthu yooreera, wa miyo, woohikhala Masu paahi. “Waamini onrwa mwaha wo wiiwa, nto wiiwa Masu a Muluku.”

² Mahiku a Namararu, ni khino Ittiminku, mmosa wa miteko sa Ettiminku, onvaha Pastore omumula vakhani paahi, yeeyo omphwanel'awe vanci-ene, ni kaahuupuwela wira khino naamukuxa Eliivuru emosa mBibiliani. Naaniiraka yeeyo, ni imaara sikina okhala mwaakha mwa yeeyo.

³ Kinnuupuwela emaara emosa naakhanly'ahu mwaakha ntero muLiivuruni mwa Wiisuupulula. Masi, oh, wulu, itthu siixuttaly'ahu, ni moota saary'aya sooreerexa! Vano naahitthikela ottuli khukuxa Eliivuru ya Daniyeli, ahiiso Eliivuru ya Maphattuvelo, wala Okhuma, nto okuxa paahi, ekapiitulu ni ekapiitulu, ni yaanimutthavaniha Bibilia othene vamosa. Oh, miyo okisivela eyo!

⁴ Ohoolo waya vakhani, nihaana okuxa e...Apwiya yatthikela-ru ereerihaka ni mnakelela ohoolo, ninookela mwa itthu kamosa-kamosa sowiixerya mu, sowiixerya saana. Nto ninoorowa okhuma nipuro nipuro, mwa Yoolempwa, ni yeeyo.

⁵ Ni okisivela okhaliha Yoolempwa olikana ni Yoolempwa. Ti siiso erin'aya okhala. Eyo elatarato emosa yuulupale ni yooreera. Nto mwa Eliivuru yeela ensom'ahu, ninrowa okela mwa, oh, woopowa, ni ovoniha wa Muluku, ni miiriirya, ni omoreliwa ikharari. Ni, oh, sothene simphwanyaneya muumu.

⁶ Ni khino kaphiya nipuro kirin'aka orowa mmithukumanoni...Nkinsuwelaka okathi xeeni onrow'aka okhala vamuthukumanoni, wiihaneliwa vamuthukumanoni, okhala wira nkirina hat'etthu yoothokihwiwa mpakha woona weettiheriwa wira etthu. Nto eyo pooti okhala ohinatthi oxa, pooti owela ntteeke kirowaka oCalifornia, mpakha oMaine wala nipuro nlo, khula nipuro Owo onrow'awe okiihana. Mwaha wa yeeyo kihinitthokihaaka, mittala suulupale soorakama, okhala wira nkikhanle wira. Orumeyi aka kuhiyo wa enamuna yeeyo, ni ti woovirikana.

⁷ Nto vano kihoorwa owaani wira kimumule vakhani paahi. Koovukuwa ikhiilu thanu na piili, muthukuman'ola wookiserya. Nto Munna Mercier ni Munna Goad yaarisa weiwo, okathi vakhani ovinre, nto khwira, “Munna Branham, kinnoona eniir'anyu. Nyuwo munihela murim'anyu wothene mwa yeeyo.”

⁸ Miyo khwira, “Eyo t’inamuna emosa paahi mukhanly’anyu waavarelaka muteko wooloka Apwiya, onkhala ohela sothene murin’anyu ohoolo mwaha wa Kristu; ikuru sanyu sothene, munep’anyu wothene, murim’anyu wothene, muupuwelo anyu wothene, sothene sirin’anyu.” Mwairaka etthu p’itthu, mwiireke oratteene ahiiso muhiire hata vakhani, moone, muhiye paahi. Mwaarowaka okhala muKristu, muhele sothene sirin’anyu wa Kristu, eyo ti wii, okathi anyu, erattelo anyu, sothene sanyu.

⁹ Miyo kaamuweha mmirav’ola. Awo t’amwaar’inyu, Munna Burns, ti siiso, anoopa ni wiipa vale, anaithoko ale amiravo. Ni—ni kehiyo epiyaano, hata orkawu, masi muthinto mmosa wa ekaruma, awo anrumih’aya ni ikatha ni okuxa, ni owiirela etthu Apwiya. Khino mwaamuwerya wira yeeyo, ni wiipa, eyo ti wii, wiihana minepa. Mwiire etthu, hata wira. Mwaawe—mwaaweryaka woopa muturi, vaareera, moope muturi. Mwiireke etthu tu. Muhinyeke onamoona wala mwiireke etthu wa Omwene wa Muluku. Etthu p’itthu murin’anyu, nvareleke muteko wo omurumeela Muluku.

¹⁰ Vano, khaninrowa ophavela opisa vanci-ene, okhala wira koosuwela wira munnivara muteko. Muhaana ovenya voosiisu oxaaka. Nto kinrowa oxaya ikhopa khula voosiisu. Kinrowa wooleelani ekeekhai paahi. Ti yeeyo eniir’aka. Ti yeeyo kirwenly’aka owaani, omumula vakhani. Vano nto kinvenya, ntoko iwoora xexe, n’urowa mutakhwani ni, ahe, oxaya vakhani ni orowa orupa. Nto kinnitthikela kikhalanaka orilela weiwe vakhani, tivo kinrowa omumula, nuvira okathi vakhani, nyuwo mwa . . . Apwiya yatthuna. Ni sothene siri saana.

¹¹ Vaareera, vano, ninrowa okhunla mBibilia ni mwanu. Kintthuna wira mwaaruheke aBibilia anyu khula ohiyu, wira nyuwo . . . ntoko sinwery’anyu. Akhala mutthu ohirina, mutthu aatthuna otthariha osoma, nookhalana kamosa-kamosa va, naamukhalana e . . . anamakhaliherya amosa-amosa wira yaakawe. Ookhala ommutthuna mmosa? Ahe, nvenxe ntata paahi.

¹² Khino Munna . . . Doc, murwe va mwaakuxe aBibilia ala. Nyuwo mweemenle vakhiviru vo, ni Munna Burns. Ti siiso, Burns? Koomwiiwa wira . . . [Munna oniira, “Conrad.”—Mol.] Exeeni? [“Conrad.”] Conrad. Kimwiihanne . . . Khino nkiniwa saana, khino, Munna Neville. Kikuminhe vayi nsina na Burns? Kinnisuwela ethoni ya mulopwan’owo, ni nkinwerya, nkaawerya wiihana nsina nawe.

¹³ Nto moosuwela, okathi munkhal’anyu owunnuwaxa, kinnoona etthu emosa, ti yookirikela omusoma Bibilia ola. Nto vannikinanara wupuwela wira kihaana owara iyookhola, wira kimisome Bibilia.

¹⁴ Masi, nno woohikhala khalayi, koono wira kaarowa okhala oohoona. Vano khurowa omoona Sam. Vano Sam khwira, “Bill,

nkisuwenle.” Khwira, “Kinrowa wookumanihani ni muratti mmosa a muteko.”

15 Miyō khurōwa oLouisville. Waahaana okhala otthuna w’Apwiya. Muratti mmosa oosuweliwa; kinooliyala nsina nawe vano. Masi owo aahisoma eliivuru aka. Nto owo khwira, “Mwatthikela-ru wAfrika, kintthuna orowa ni nyuwo.” Owo khwira, “Ni nyuwo mwa. . . Atthu ale a wAfrika annoophentani.” Ni khwira, “Awo khareere okhala anamakupali ithiru, vanci-enexa ni mwaalo, wiithikilasa. Tivo,” khwira, “Kintthuna kivahe miyeeri mithanu na mosa s’ekumi aka, so owooperari aana a mmaithoni ni itthu, wa e. . . mmutekoni.” Ni khwira, “Vaakhanle wira naamuwerya orowa vamosa, nto mwaamuwerya okhalana ocaliwa w’awo, siiso,” Khwira, “nto awo yakhalana aana a mmaithoni ni miteko soovariwa mmaithoni,” khwira, “vaamukisivela paahi wira, woohivekela musurukhu, miyeeri mithanu na mosa.” Nto kinooliyala okathi xeeni murin’anyu olipelela okumana n’uwo.

16 Nto hiyo naakilanthe esaala yaamukhaani ni ekhaani—eluuu ekhaani yooxeerya yaapatta, ottuli iwe musaala mooriipela. Vano, kaaniwerya osoma ileetera iye. Saahimya miloko miili-miloko miili. Kaaniwerya osoma wa khula enamuna. Nto owo khuhelela muloko ni thanu-muloko ni thanu, ni kaaniwerya osoma. Ni khuhelela muloko-muloko, nto kaaniwerya osoma. Owo khwira, “Ahe, khiivo evonyeyanxe ni maitho anyu.”

17 Vano owo aahikhalana eteleskoopiyu yaamukhaani. Owo khuhela ekaruma yaamukhaani ottuli iwe, etthu yaamukhaani, moosuwela. Iteleskoopiyu iye sa khalayi, akavi anuupuwela seiyo? Hiyo naaniwehaka ni seiyo, oweha ilatarato, siiso. Nto owo khwira, “Munniwerya osoma ele?”

Miyō khwira, “Ayo, mulopwana.”

Owo khwira, “Mukisomele.”

18 Yaarina e, oh, nuulumo nothene, ntoko *saale*. Miyō khupacerya, osoma; owo khupacerya opurulela osulu, *siiso*, aroihaaka vakhaani vakhaani. Vaphiyenry’aya so, miyo khweemela. Owo khwira, “Kinoowerya wooleelani etthu emosa, mooviriha miyaakha miloko mixexe.”

Miyō khwira, “Ayo, ti yeeyo, kivirinhe khalayi.”

19 Owo khwira, “Mwiirale sayi eyo?” Owo khwira, “Niitho na mutthu, v’ephattu, mwaphiya-ru miyaakha miloko mixexe, ntoko maihi anyu ankhala oottweelela, ni siiso, erukuruku ya niitho enkhala yowaataleleya.” Khwira, “Vano, mwakhala-ru okathi munci-ene voophiyerya, enoolokiheya-tho.” Owo khwira, “Eyoonelo eyo ya nenli, eniihaniw’aya. Masi,” khwira, “mutthu, oophiyaka miyaakha miloko mixexe vekeekhai awo ano. . .” Khwira, “Khiivo etthu enivonyeya ni maitho aya.”

20 Kinniwerya—kinniwerya wona ekharari yaakhanle wira eri vathi, yakirakamela vale. Masi yakaattamela-ru. . . Nto owo khwira, “Vano, mmusome Bibilia anyu,” khwira, “mumpurule mwiirakamelihe.” Khwira, “Nuvira okathi vakhani, moonu anyu khunrowa orakama voophiyerya, mpakha muhinwery’anyu—muhinwery’anyu okhuma vo voophiyerya wira mulipiherye.”

21 Vano nto owo ookipakela iyookhola, nto epante aya ya vathi vanniweryaneya, ti yoosoma-no. Owo iirale, “Vano, vapulpitu vanyu. . .” Owo oona wira kaari mmosa w’alaleyi ala oottotopeliwa, moosuwela. Vano nto khwira wira e. . . nyuwu. . . Epante y’osulu eri eviituru pure, eviituru pure pahi. Nto epante ya vathi sirina muthinto mmosa wa mphimo vaavo, wira kiweryeke osoma vakhiviru, moosuwela, *siiso*. Tivo okisivela owara; okisivela.

22 Nto vano, omwiixuttiha Bibilia, nto kirina Waataana Wa Naanaano ohiy’ula. Vano ti. . . Kihaana Waataana Wa Naanaano a Collins ni orina iletera sowunnuwa saana. Masi vano, kamutthikela mukina, miyo—miyo khino kihaana waarowela apatthani ale a khalayi, ni—ni osoma ni seiyo. Masi etthu p’itthu, ki—kinnitteeliwa murima okhala wira kookhalana etthu ki—kinwery’aka nlelo osoma. Ni—ni—ni etthu p’itthu erin’aka, kinrowa waavaha atthu othene sothene kinwery’aka, wa ovuwa wa Muluku, kinromela wira Owo onookumiha ethoonyeryo eyo ya munnuwelo. Nkikhanle onvekelaka wira Owo akumihe munnuwelo. Miyo. . . Ayo, eyo etthu emosa paahi hiyo othene erin’ahu wira. Nihaana ovira mwa yeeyo. Ni koosuwela wira nkhiyo mwammiravo ntoko saary’aka, keemenle-ene va vaplataforma. Kirina miyaakha miloko mixexe ni mithanu na miraru. Nto muupuwele paahi, miyaakha miili tho, kinrowa okhalana miyaakha miloko mithanu, Munna Mike.

23 Wulu, ti yookirikela waamini! Miyo paahi. . . Nkaasuwela wira kaahiviriha miloko miili mpakha miyaakha miili sivinre. Ti yeeyo. Ti yeeyo. Miyo paahi. . . Nkaawerya waamini. Ni nnakhala vo miyo—miyo. . . Yaari yookirikela waamini mpakha kaawehaly’aka muloolani, vano nto ka—koosuwela wira ti siiso, nto. Masi—masi mwa oweha, kinnoona saana ntoko sitonko aka wona kookhalaru, ni kinnixukhuru mwaha wa yeeyo, nave. Nttotopelo wothene okhale wa Muluku.

24 Vano, hiyo ninsoma Eliivuru y’aHeperi. Eyo ennikhala. . . Oh, eyo emosa wa Iliivuru soowiixeryaxa, sooreerexa sa Bibilia. Kinimooleelani, eyo Eliivuru emosa vekeekhai enrowa. . . Muluku atthuniherya vale, ni okelaxa vathi mwa yeela, kookupali wira ninoophwanya ithekeni sa eweero mpakha vanrow’ahu okhuwela tu mittotopelo wa Muluku okathi wothene. Nto vano miyo. . .

25 Eliivuru y’aHeperi, Yeeyo tthiri ekhanle, enuupuweleliwa wira elempwe ni Paulo Oowarya, mutaphuleli muulupale a

Bibilia, wooka waka, olumwenku otonko aya okhalana, omuhiya Pwiy'ahu Yesu Kristu. Nto Paulo aavalaaniha e. . . Vano, Paulo aari muxuttiha eekeekhai a Bibilia; eyo ti wi, Waataana Wa Khalayi. Eyo yaari Eliivuru emosa paahi yaalempwe okathi ule, yihaniwa Bibilia. Nto owo aaphavela owooniherya aHeperi, avalaanihaka Waataana Wa Khalayi ni ooniheryaka wira Waataana Wa Khalayi yaari eruku wala ethoonyeryo ya wa Naanaano.

²⁶ Vaavo vo hiyo naamuwerya okumiherya mwaha ni okhala miyeeri miraru vaavo tu mwa muupuwelo yoowo mmosa, vaavo vo. Wira nitthikele ottuli, vakhala wira naamuwerya waakhunla aBibilia ahu vano, tthiri niri mw'aHeperi, kapiitulu 1. Masi nakhunla-ru Wiisuupulula, kapiitulu 12, munimoona-tho oratteene, moota ikhanly'aya iruku. Vakhala wira. . . nyuwo murina ilaapi sanyu ni munrowa okweretha Soolempwa. Mwa aHep- . . .

²⁷ Wiisuupulula 11, ninnoona wira Yohani, esisiro y'oPatimu, aahimoonaa muthiyana eemenle musulu, nto owo aarina nsuwa vamuru ni mweeri vathi va inawu sawe. Vano muthiyany'owo aari n'uwereya w'oyara, wira omuyare mwaana. Owo aahimuyara mwaana mulopwana. Ehanasi yooxeerya yaaheemela, wira emmirye mwaan'owo ayariwaka-ru. Nto mwa—mwaan'owo aahikuxiwa khurowaniwa Wirimu, ni muthiyany'owo aahitthyawela mothakoni weiwo aalyihw'awe wa okathi, okathi, ni okathi nuusu, wala okawanyiwa w'okathi.

²⁸ Vano, muthiyana aathoonyerya ekereja, nto Mwaana aamuyanry'awe aari Kristu. Mweeri vathi va inawu sawe saari ikano, nsuwa vamuru vawe yaari mahala. Ittheneeri muloko ni piili v'ekharani vawe yaari arummwa muloko nanli. Nto ti vaavo, va. . . Arummwa muloko nanli waari ovuwa wala owarihiwa ekhara wa Waataana Wa Naanaano. Munnona? "Tthiri khasivo milipiheryo mikina sikhante othipeliwaka woohikhala iye sithipeliwe." Munnona? Eyo, Mulipiheryo, wa—Waataana Wa Naanaano, arummwa, Mwixuttiho w'arummwa, ni sikina, ti ekhara ya mulipiheryo wa Waataana Wa Naanaano. Vano nto va. . .

²⁹ Mweeri ti eruku ya nsuwa. Nsuwa ninooniherya waarya waya okathi ninkhal'aya ottuli w'elapo. Vano mweeri onnivaha waarya, wira weettiweke, ohiyu. Nto elatarato xeni yooreera nrin'ahu va, elatarato ekina yooreera: nsuwa nimmuthoonyerya Kristu; mwe—mweeri onthoonyerya Ekereja. Iyo siri ntoko iya ni mwaara. Nto ohikhala-vo wa Kristu, Ekereja enooniherya Waarya vakhani, Ehapari yooreera. Ni iwo—iwo ti Waarya wira weettiweke-mo mpakha Mwaana ovenya-tho, vano Ekereja ni Mwaana, mweeri ni nsuwa, sintakanxana vamosa. Munnona? Mweeri mpantte wa nsuwa, ni Ekereja mpantte wa Kristu. Vano vahinkhal'awe Kristu, Ekereja enooniherya Waarya Wawe. Vano siiso sinwery'ahu wooka mweeri waarya, vannisuweliwa wira

nsuwa nnimwaarya nipuro nlo. Ni vakhala-ru wira Ekereja enooniherya Waarya wa Kristu, Kristu ori mukumi nipuro nlo. Amen. Muupuwele yeeyo.

³⁰ Vano, ikano saari ethoonyeryo ya mahala, masi ikano khisaarina owerya wo woopola mwa seiyo. Ikano saari paahi e. . . Ikano saari mupiliisa. Mupiliisa onohelani mukhatteya, masi, moone, antthuneya mahala wira yookumiheni mukhatteya. Munnona?

³¹ Tivo Ephome ya Kristu, Ehapari yooreera, enninivuluxa mwa itampi. Ikano paahi sinnikhaliha anatampi. Ikano paahi saahimya wira, “Nyuwo mwa natampi. Muhiye. Muhiraruwe. Muhimootherye mukhw’inyu.” Munnona? Owo mupiliisa onihimya wira moovonya ni moottheka. Masi Ehapari yooreera ti mihupi sooreera. Kristu ohookhwa wira anoopole mwa soottheka sahu sothene, ohonona ikano. Kristu ohookhwa wira anikumihe-mo.

³² Vano, Paulo, amalaka-ru orukunxa murima, owo khaakohakohale hata eseminaariyu, nnakhala khaamukohale hata murumeyi. Masi mooweha? Owo aaronwe wArapiya, khukhala weiwo miyaakha miraru, wArapiya. Vano, ela ti, mwa wuupuwela waka, wira. . .

³³ Vano, nihaana ophwanya mulipiheryo wa yeela, wira nisuwele moota ery’aya yoothuneyaxa. Nto nisomi noopacerya, ohiy’ula, ninkuxa mulipiheryo ahu.

³⁴ Vano, Paulo aari musomiha a Bibilia, okhala wira owo aasomihiwe ni Kamaliyeli oosuweliwa, muulupale a okathi wothene. Ni aari mmosa w’ale oosuwelaxiwa a nihiku, musomiha muulupale a ikano ni maprofeta. Tivo, Paulo aari oosoma saana wa itthu iyo.

³⁵ Vano nto miyo onikisivela siisa, muupulul’ola muulupale, okhala a exariya mmurimani mwawe, namwiiva, aaheemererya okhwa wa Sitefano ni aahimoono Sitefano okhwa ni maluku ni makotto mwaha wo ovonyakasiwa mpakha okhwa. Kinoona wira eyo yaahaana omwiiniha murima Paulo okathi waamoonaly’awe Sitefano ovenxerya matata Wirimu, khwira, “Kinnoona Erimu otthukuwa. Kinnimoono Yesu eemenle-ene moonoo woolopwana wa Muluku.” Nto owo khwira, “Tithi, muhaalumulele etampi ila w’awo.” Vano owo khurupa.

³⁶ Mooweha yeeyo? Owo khaakhwiye. Owo aaroorupa. Ntoko paahi. . . Nkinikupali wira owo aahoona owereya nluku nikina. Ntoko tutthu vatthirima v’ame awe, onrup’awe, Sitefano aahirupa mmoononi mwa Muluku.

³⁷ Yookhala etthu, mwaha wa Paulo, yaamwiinihale murima. Vano owo, ntoko khula mutthu onkhala ookupali, oneererya owanana Eyo, owo onrowa wa mukhulupale a anamukuttho n’ukuxa iwarakha kamosa-kamosa. Khwira, “Kinimwaavara athu ale othene ankumiherya onyakula iwe wothene, ni

ikawanyeyo iye;” yeeyo yaahimmwa, yeeyo yaarow’ahu wiihana olelo, “namathipelela oolipa murima,” wala etthu ntoko yeeyo, enyakulaka vanci-ene ni ekumiheryaka enyoonyiheryo. “Hiyo nnoorowa namalihe eyo.”

³⁸ Vano owo arowaka, yaamukhaani . . . kahi ephiro yuulupale ntoko sineett’ahu. Nto iphiro iye oPalestina, mip hito mikhaani paahi, ntoko mphito wa inyompe onvira mutakhwani memmo inyompe, ni ipwittipwitthi, ni ikhavalalo, ni akhole, ni inkamiya, saarow’aya mmyaakoni.

³⁹ Nto Paulo, arowaka oTamasiku, ntoko othana eriyari, nihiku nimoso, Waarya wuulupale waaryale waahimmana khummoroxela vathi. Khaavo oonale Eyo woohikhala Paulo. Kintthuna wira nwehe yeeyo. Nto vaavale, ela kehiyo ya mutthu mmosa vano, masi hiyo nineettiherya mwa mulipiheryo yoola. Wira musuwele wira Yesu yoowo . . .

⁴⁰ Vano, okathi Owo aary’awe muumu elapo ya vathi, Owo iirale, “Miyo kikhumme wa Muluku, ni kintthikela wa Muluku.”

⁴¹ Vano, okathi Owo waweettih’awe aana a Isarayeli, Owo aari Nlumi na Mooro. Ni Owo aahipaka erutthu, numala Owo ootthikela okhala Nlumi nenle na Mooro. Nto okathi Owo okumann’awe ni Paulo arowaka oTamasiku, Owo aari Nlumi nenle na Mooro, Waarya weiwe, moone, Waarya wuulupale. Nto Paulo iirale, “T’ani Uwo miyo ommulupath’aka?”

⁴² Owo khwira, “Miyo ka Yesu, Yoowo ommulupath’anyu,” Waarya. Oh, Owo kahi ooreerexa?

⁴³ Nto Owo ori va, ohiy’ula, vaava ni hiyo. Ootthuniherya elatarato Awe okumiheriwa vale, Etthu emosaru, moone, Nlumi na Mooro, Waarya, siiso ntoko Owo saakhanly’awe, “Mmosaru nsana, olelo, ni mahiku othene.”

⁴⁴ Vano axilopwana yaari ni yoowo khayoonale Waarya iwe, masi Owo waari vaavale vamosaru. Sookumiherya saari imosaru.

⁴⁵ Vano, vanniweryaneya wira—wira mutthu aamuwerya omoona Kristu mpaani mu vano hata mutthu mukina khuhimoono Owo? Khweeli. Yaahiiraneya iwe.

⁴⁶ Yaahiiraneya-tho ohiyu umosa okathi Petru aary’awe mukhatteya. Nto Waarya iwe khukela mukhatteya, khimukwannya Petru, vano owo khweetta khuvira vakhiviru va mulipa-oolipelela a mpaani, mulipa-oolipelela a vate, khuvira vamukhora, mukhora muulupale, ni mukhora wa mmuttettheni. Petru khwira, “Siiso kilohaka.” Masi owo aahiwehaweha, masi Waarya waahilakaseya; Kristu, Waarya iwe, Woohimala wa mahiku othene. Ole ori vale. Vano, mphironi arowaka . . .

⁴⁷ Nto nwehe, etthu ekina, vaakhala wira naamuhimya ela, enoomalaru okirweela mmuruni. Masi asuweli ale yatthanre Ettheneeri, ekhumaka oHintiya, Onikhuma nsuwa, miyeeri,

eviraka mukhatoni ni mothakoni (yaahivira munweheryoni; nto awo yaalikelala okathi w'ohiyu ni ittheneeri) nto khaavo hata nammulepa wahala wala mutthu ti mutthu otonko ohimya wira ootoko woona Ettheneeri ile woohikhala asuweli. Yaatthomeliwe paahi wira awo yoone Eyo.

⁴⁸ Vano nyuwo pooti woona itthu mutthu mukina ahaarow'awe woona. Wa nyuwo, Eyo ekeekhahi. Wa owo, awo khansuwela saana. Siiso ntoko orukunxa murima; nyuwo pooti orukunxiwa murima ni opuha iparakha sa Muluku, paahi—owurya paahi muhina mwa iparakha sa Muluku. Vano mutthu mukina, okilanthé vakhiviru ni nyuwo, “Nkinoona etthu.” Munnona? Munnona? Ti yeeyo. “Miyó nkinsuwela saana tu. Nkinoona xeeni yothene eyo.” Ahe, owo khonvara Eyo tu. Ti yeeyo tu. Vaavo, nyuwo munvar'anyu.

⁴⁹ Nwehe vano, Paulo arowaka ephiro awe. Vamalakarú omukhumelela musuwelelo ola . . . Vano, owo khaasiveliwe . . . Ti yeeyo enimukhaliha Paulo ooromeleya saana.

⁵⁰ Vano, nisomi nahu ohiy'ula khanihiyo nowiixerya. Nlo nisomi nookhweya, masi, oh, ninookela mowiixeryani, nuvira okathi vakhani. Masi nla nisomi nookhweya saana, masi ninoopacerya paahi. Nto etthu nikhanly'aya, eyo etthu emosa, onvuwiha Yesu Kristu. Paulo, wira opacerye.

⁵¹ Nto owo ohinatthi wira yeela, Paulo aari nammusuwela Bibilia. Nto nammusuwela a Bibilia khonlipiherya mwiixuttiho awe vasulu va misuwelelo. Nnari, mulopwana. Awo khalipiherya mwiixuttiho aya vasulu va musuwelelo. Nyuwo pooti okhalana khula enamuna ya musuwelelo. Masi ehaana okhala SIISO ANIHIMYA T'APWIYA. Ekeekhahi.

⁵² Vano, Waataana Wa Khalayi, awo yaarina inamuna tthaaru soovirikana yaakhanly'aya osuwelaka mutthaka. Yoopacerya, ikano, yaari ni ikano paahi. Numala, awo yaahikhalana pro—profeta; namaloha; ni yaahikhalana Urimi Tumimi. Vano eyo pooti okhala yowiixerya vakhani.

⁵³ Urimi Tumimi yaari ekuwo ya vatthirima Aroni aawar'awe vatthirima wawe. Vo yaahikhala maluku muloko ni manli: yaspe, sartoniya, karpunkulo, ni makina, erowaka siiso. Awo yaarina maluku othene muloko ni manli maalupale, yaari vakuwoni ya vatthirima, yooniheryaka wira owo aari mukhulupale a anamukuttho a khula nihimo, mahimo muloko ni manli a Isarayeli. Ekuwo ela ya vatthirima yaathomeiwa vanripuni mukereja. Nto okathi profeta aalaleery'awe, vano awo enatthuna okupali wira yaari yoolikana, wala nnari, maprofeta wala anamaloha yeemela ohoodo wa Urimi Tumimi ula, vano owo aamuthariha yooloha awe wala yoowoona awe, etthu p'itthu oonaly'awe. Nto vakhala wira Waarya iwe wooreerihiwa . . . Oh, munnoona? Muluku kweekwe aakhala mmukhaleloni wa erimu. Othukumana, mithuko iye, saari mithuko pure mpakha

nsu nla naakhum'aya. Nto okathi nsu naaman'aya maluku ale, yaahikhale-ru ya wirimu, owo waakhala woohivara etthu. Masi yakhala-ru ya wirimu, Waarya iwe wothene wooniherya nthepa na ekhweyi vamosa. Amen. Vano, Owo aari Muluku aalavula, "Owo profeta Aka." Wala, "Yooloha eyo ekhumme wa Miyo." Waari omutthariha Urimi Tumimi awo yaaphuk'aya.

54 Munnimuupuwela Sawuli okathi aatthikenly'awe ottuli? Owo iirale wira khaawerya okhalana yooloha. Vano profeta, Samuweli, aahikhwa, ni khiyaakhanle hata enamuna. Owo khwira, "Nnakhala Urimi Tumimi khonlavula ni miyo." Hat'etthu. Sawuli aamweemela ohoole wa Urimi, vano moolumo awe yaakhala imanelo soohiruma. Munnona? Muluku aahimukhoota tu. Nto Urimi Tumimi ule, waari olipiheriwa wa Aroni wa onamukuttho awe. Vakhwiw'awe Aroni, Moise, ekuwo eyo ya vathirima yaathomeiwe vanripuni.

55 Vano, onamukuttho w'Aroni waahimala okathi Yesu okhwiw'awe. Nto vano, ovalaaniha ikano ni mahala, hiyo nlelo nookhalana Urimi Tumimi. Nto Paulo aamurumeela Yoowo. Munnona? Urimi Tumimi olelo ti Masu a Muluku Ahinikhwa, Ahinimala, a mahiku othene. Munnona?

56 "Maana ole onrowa okumiha etthu muLiivuruni mu, wala wuncererya etthu Mu." Nkintthuna hat'etthu woohikhala Yaala, masi kintthuna yothene Ala arin'aya. Eyo ti Ekereja enthun'ahu. Nto ithu sothene sihaana wooniheriwa ni Masu.

57 Mwaha wa yeeyo kaaxinttiw'aka naanaano eriyari y'atthu aPentekosite, okhala wira, kihimyaka, "Nkaawerya osuwela saana vatthu makhura anttonyaaya mmatatani mwanyu, wala ephome wiitho wanyu, yaary'aya ethoonyeryo wira muhaana Eroho Yowarya." Eyo kehiyo ya Yoolempwa ni miyo—miyo nkaawerya okupali iyo. Ehaana okhuma mwa Masu.

58 Nto vano, Paulo, owo aaniphenta Masu. Tivo, owo ohinatthi otoko okhalela onamoona musuwelelo ola muulupale aarin'awe, aahirowa wEjitu miyaakha miraru. Kookupali wira saari miyaakha miraru, miyaakha miraru wEjitu. Ni moosuwela etthu enkupali aka wira aahiira? Kookupali wira owo aakunxe Waataana Wa Khalayi, khuphavelasa mwa Waataana Wa Khalayi, khuphwanyana wira Ole vekeekhai aari Mesiya mara. Owo aahaana olipiherya musuwelelo awe ni Bibilia. Amen. Oh, wulu!

59 Nkanweheni okathi waary'awe mukhatteya. Nwehe, wookhala o—okathi wa makhalelo a Paulo owo aary'awe mukhatteya iwe okathi munci-ene. Owo khulepa Eliivuru y'aEfeso. Owo khulepa Epaphelo ela y'aHeperi. Munnona? Owo aahikhalana okathi. Muluku aamuhenle mukhatteya mme, nto owo khulepela Ipaphelo iya ikereja. Emosa wa ekereja yo wEfeso. Owo aahilepela emosa ekereja ya Pentekosite, aahikhalana mikattyamiho sinci-ene n'awo. Ekereja ya

Pentekosite owo aahikhalana mukattyamiho munci-ene onvikana mutthu ti mutthu mukina. Nlelo ehaana. Masi owo khaareere oxukhuru mwaha wa yaawo. Etthu emosa paahi aawery'awe owiixuttiha... Okathi waakel'aya: mmosa aakhalana elavulelo, mmosa aakhalana nsipo, mmosa aakhalana moonelo, mmosa aakhalana moonelo mmosa. Owo khaawerya olavula, waaleela, "Nroromelo ohinimala." Owo khaawerya waaleela "otthommwa." Owo khaawerya olavula n'awo, awo yaari anamwane. Awo othene yaahaana o—yaahaana okhalana moonelo w'etthu, wala woona etthu, wala miyoonelo sootikiniha, ni, wala etthu emosa yaarukurerya, ikeekhayi kamosa-kamosa.

⁶⁰ Masi kookupali wira, okathi aalavul'awe n'aEfeso, owo aaniwerya olavula mwaha wa, "Muluku oonitthoma hiyo okhala aana alopwana n'athiyana, ni oonikhaliha ntoko aana mwa Yesu Kristu ohinatthi opattuxiwa olumwenku." Nkawehani yeeyo. Wulu!

⁶¹ Nkanweheni orwa mwa Eliivuru y'aRooma, ni sikina. Awo yaari ookhomaala. Oh, awo yaanilavula ilavulelo, vekeekhai, ni yaahikhalana ithoonyeryo sikina sa Eroho Yowarya eriyari aya. Masi khiyaapaka miixuttiho, ni miyoonelo wi, ni iriiryelo, ni miyoonelo sootikiniha.

⁶² Paulo khwira, "Mu—mu—munoosusa ni yeeyo. Okathi waarin'anyu wira mwiixuttihaka, nlelo mw'anamwane nto muhaana owurya eleethi."

⁶³ Vano, ti yeeyo kweekwe emphavel'aka owanela wira etapernakulu ila ekhale, kahi nikhuru n'axinamwane. Nrowe nikhale ookhomaala. Okhala mphironi. Oh, wulu! Eyo vo.

⁶⁴ Vano, Paulo onrowa iwe, toko, woona sinto musuwelelo awe waanilikana ni Bibilia a Muluku.

⁶⁵ Oh, khiyaarowa okhala yooreerexa, olelo, vaakhanle wira atthu yaaniira-tho yeeyo, naakhaliha musuwelelo ahu olikana ni Bibilia a Muluku? Waahilikane, weso musuwelelo ahu ti woovonyeya; khonaarya mu Urimi Tumimi. Owo waaryaru Mmo, amen, musuwele wira moophwanya. Masi yaahiire, akina... Nkincala oreera xeeni ononey'aya, moota xeeni waakhanly'aya ntoko woolikana; waarya iwe waahiphanime va Urimi Tumimi vale, yaahivonyeya.

⁶⁶ Ni hata wira musuwelelo mukavi munkhalanak'anyu, moota xeeni onkhal'aya ntoko w'ekeekhai, moota xeeni oniisoonihery'aya, osoma xeeni ory'aya, ekaruma xeeni yuulupale okhanly'aya wo oruha minepa; waahiphanime muhina mwa Masu, ti woovonyeya. Ekeekhai. Ohaana olikana ni Masu.

⁶⁷ Vano, kinnaamini...yookhala eriyari y'ephiro. Ephiro, vano, imaara sinci-ene...Kaanrowaka okereja Nasareeno. Apwiya yaareerihe atthu ale oophenteya. aMetotista a enamuna ya khalayi, ooreerihiwa ti yeeyo akhanly'aya; ekereja ya Muluku,

Nasareeno, Anawetta a Osantu ni sinci-ene sa ikereja iye sa khalayi sa osantu. Ni awo yaaniipaka nsipo nimosa:

Kineetta ephiro yuulupale ya khalayi,
Kihimyaka mapuro othene onrow'aka,
Kaamwamputi okhala muKristu a okathi wa
khalayi, Pwiya,
Ovikana etthu p'itthu ensuwel'aka.

⁶⁸ Vooreera. Yooreerexa. Vano nto awo yaanilavulaka mwaha wa ephiro ya ereerelo murima. Vano, mwasoma-ru vaavo, awo anikuxa eyo mwa Yesaya, kapiitulu 35. Vano, mwaweha vale, owo iirale, “Enookhala ephiro yuulupale, *ni* mphito.”

⁶⁹ Vano, *ni* etakanxeryo. Munnona? Ephiro yuulupale, khiyaari ephiro ya ereerelo murima. “Enookhala ephiro yuulupale, *ni* mphito, nto enrowa wiihaniwa, ‘Ephiro ya ereerelo murima,’” kahi ephiro yuulupale ya ereerelo murima. “Ephiro ya ereerelo murima!” Ni ephiro ya rampha enkhala eriyari ya rampha. Etekiwe *sa* wira maasi ekumiheke ikokhola, ipantte soopiili, emukhaliheke rampha ooreerela. Khamu, munookhalana malitti muramphani mwanu, okathi wothene, yaahipakiwe-ru oratteene. “Ephiro” ti eriyari ya rampha.

⁷⁰ Vano, epantt'*ila*, atthu yarukunxa murima, miyuupuwelo saya sinkhala mwa Kristu. Nto vakhala wira awo ankhala mwa etthu yoosomaxa, ni khuhinakhala evekelaka, anookhala ooriirya saana, ni oolipa, ni ookhaleleya, ni oohicaliwa. Vano nto awo yananiwaru vakhani paahi, mwaahiwehe, awo anookhala oolipa murima ni oowali, epantt'*ila*, moone, awo anookela mwa miyoonelo wi ni itthu sothene.

⁷¹ Vano, masi, Ekereja y'ekeekhai ti Ehapari yooreera y'ekeekhai ekumi, eriyari ene ya rampha. Kehiyo yooriirya ni yookhaleleya, nnakhala kuhiyo onamathipelela. Enkhala Ehapari yooreera, yooreera saana, ya khalayi, yooviha ya ophenta wa Muluku mmurimani, erowaka eriyari ene ya rampha, eniihana ipantte soopiili. Ti yeeyo. Vano ti yeeyo e...Nto munrowa okhalana sayi Ekereja eyo? Memme mme Mmasuni, Urimi Tumimi.

⁷² Vano, Paulo aatthuna okeliha ekerej'ela eriyari ya rampha, tivo owo aahirowa khusoma miyaakha miraru Soolempwa aasuwel'awe. Tivo, Paulo oolepa epantte yuulupalexa ya Waataana Wa Naanaano. Muluku aahimutthuniherya wira yeeyo okhala wira waanirwa okathi w'Amalapo. Matewu, Marku, Luka, ni Yohani, wa Ihapari xexe, awo yaari aYuta. Masi Paulo t'olemphe ipaphelo sinci-ene.

⁷³ Vano nwehe, vano, ninrowa opacerya okhalana mulipiheryo ola vano, vatthu vaary'awe, alepaka Yeeyo, ary'ene mukhatteya. Nto owo aahikhalana musuwelel'ola wothene. Masi, yoopacerya, musuwelelo awe waapacenrye wehereriwa, nto ela ti epaphelo awe ehulelo wa yeeyo. Ela ti epaphelo awe ehulelo. aRooma

ni aEfeso, ni siiso, aakhalana opuro aya, masi ela ti epaphelo ehulelo.

⁷⁴ Vano, ekapiitulu 1 yothene *ti* onvuwiha Yesu, ni omuvalaaniha Owo okhala profeta. Owo ti mwaha wothene vano. Kinoophavela ophiya mwa yoowo vowaakuva sinwery'aka vano, wira nihipise vanci-ene. Mwaha ene wothene *ti* ovalaaniha ekap-...esya...Ekapiitulu 1 *ti* onvalaaniha Yesu ni khula profeta, wala khula nlamulo, wala sikina, ni omooniherya Ole okhanle Yesu. Vano nkawehani, "Muluku." Nimpacerya, nuulumo noopacerya, "Muluku."

Muluku, khala-...yoowo khalayi...

Khalayi enihimya "ottuli saana," okathi ovinre.

...khalayi ni inamuna sinci-ene aahaalavuliha axitiith'ahu ni inamuna sinci-ene ni moolumo a maprofeta,

⁷⁵ Vano, moone, "Muluku, khalayi, ottuli saana, Owo aahaalavuliha axitiithi ni moolumo a maprofeta." Eyo ti enamuna Owo aarin'awe wira avahererye Mutthaka Awe, ni moolumo a profeta Awe.

⁷⁶ Muluku aamuruma profeta Awe ntoko Eliya, Yeremiya, Yesaya. Nto nyuwo mwaweha vale, khenatoko mwa wahala othene a olumwenku, ekereja khenatoko omukumiherya profeta. Mphavele mwa Waataana Wa Khalayi, Waataana Wa Naanaano, wala mahiku ala, mahiku ookiserya. Mukoonihe profeta mmosa otonko okhumelela mukereja mahiku ookiserya. Mukoonihe mmosa otonko okhumela, mmo. Ni mukoonihe emara emosa profeta, murumeyi eekeekhai a Muluku, enamuna ya mukereja ya molumwenkuni ehimulamunly'aya.

⁷⁷ Muupuwele yeeyo tu. Yeremiya, Yesaya, mwa Waataana Wa Khalayi wothene, awo yaanaalamula. Yesu iirale, "Nyuwo munnaatekela mahiye maprofeta ni okhaliha ootteela, nave ti nyuwo mwaahenle-mo." Eyo ekeekhaii.

⁷⁸ Ekereja ennithikela yeeyo. Nkanweheni Patrisio Oowaarya. Nyuwo aKatolika munimuhimya okhala awinyu. Owo kahiyo-tho hata muKatolika ntoko miyo sihikhanly'aka. Eyo ekeekhaii. Masi munimuhimya okhala awinyu.

⁷⁹ Nkanweheni Fransisko Oowaarya a wAsisi. Munihimya wira t'awinyu. Owo kahiyo-tho muKatolika ntoko miyo.

⁸⁰ Nkanweheni Jowana a Arko. Nyuwo murompaha vakhomoni, ntoko mukhwiri, okhala wira aanoona soowoona ni aari a erooho. Mumpaha vakhomoni. Nto muthiyan'ole anelaka omoreliwa ikharari, vano awo khumpaha vakhomoni. Miyaakha soophiyaka emiya ohoolo waya, awo khuphwanya wira owo aari profeta muthiyana. Owo aari murumeyi a Muluku. Oh, tthiri, mpanke elapelo yuulupale: murimuuhula irutthu s'anamukuttho khurihela mmuro.

⁸¹ “Nyuwo munireeriha mahiye a maprofeta, nave ti nyuwo mwaahenle mme.” Khweeli. Enamuna ya mukereja khenamukumiheryeke mutthu a Muluku; nnakhala, kheniira olelo, ni khenkhalakhala yiraka. Etiini yoothokihwi khenakhaleke etthu y’opaka ya Muluku.

⁸² Ekereja yoothokihwi ya khalayixa molumwenkuni ti ekereja Katolika; Lutero, ya nenli; vano khurwa Zwinglio; numala Zwinglio, khurwa Kalvino; Kalvino, khunarowa, Anklikano, Anklo-Sakison khunarwa, vano ekereja Anklikana; vano Mwene Enrike a Neethanu n’araru, okathi ovaanyihaly’awe, ni sikina; nto khunarwa mpakha Metotista a Wesley, ni aNasareeno, Anawetta a Osantu; nto erowaka mpakha yookiserya, ekhanle ya Pentekosite, othene ahiitthokiha. Nto Bibilia onniixuttiha voowooneya wira ekereja Katolika mu—muthiyana oohifayi, ni ikereja prustante ni mitthenkeso saya t’axaan’aya, Wiisuupulula 17. Eyo ekeekhaii voolikana. Tivo awo. . .

⁸³ Kahi atthu, vano. Aakhala atthu ooloka mwa ikereja sothene iye; atthu, oowaarya oowoopowa. Masi Muluku khoniwiihana atthu Awe ni mutthenkeso. Owo oniwiihana ntoko atthu va khula mmosa. Muluku onivara muteko ni atthu va khula mmosa, hata mukhalaka Mmetotista, Patista, Prustante, ni muKatolika, wala ele mukhanly’anyu. Muluku, ohinatthi opattuxiwa olumwenku, aahoosuwelani, ni khoththomelani Ekumi Ehinimala, wala mutthomeliwe opweteya Woohimala. Kahi. . .

⁸⁴ Owo khaatthuna wira nyuwo mpweteye, wira mpweteye. Masi, Owo ory’ene oohimala, Owo aahaana osuwela emalelo okhuma wopaceryani, ahiiso Owo kahi Muluku. Tivo Yesu khaarwiye mulaponi wo wira paahi, “Ahe, Kinimoona sinto onookhala mutthu ommoriwa ikharari. . . Miyo kaira ni kakhwa, mwa enamuna yootakhala, awo khino animuupuwela, ‘Ahe, miyo. . .’ Eno—enookupaliha mirima saya, ni anoo. . .” Muluku khoneettiherya muteko Awe siiso.

⁸⁵ Yesu aarwenle etthunelo emosa y’omeekha, yaari, yo owoopola ale Muluku, ohinatthi opattuxiwa olumwenku, aasuwenly’awe wira yaamoopowa. Owo ohimnye siiso. Ti yeeyo. Vano nyuwo. . . “Kahiyo ole onthuna, wala ole onthyawa; t’ule Muluku onimmorel’awe ikharari.” Paulo oohimya eyo. Mulopwana yoowo va.

⁸⁶ Owo iirale, “Mwaha wa yeeyo Muluku aawery’awe wira, Esawu wala Yakope oowanli ehinatthi oyariwa, Owo iirale, ‘Kinnimpheenta mmosa nave kinnimunyokha mukina.’” Amiravo oowanli awo ehinatthi oyariwa, Muluku aahisuwela wira Esawu aari nawootothe, ni Owo aahisuwela wira Yakope aari e. . . owo yaanimusivela eyuulupale. Vano Owo aahisuwela, olumwenku ohinatthi hata opakiwa, yeeyo. Vano, ninoorowa osuwela muhina

mwa minuutu mmosa aari Pani ule aasuwenle. Ekapiitulu ila yookhalana.

Muluku, . . . *khalayi ni inamuna sinci-ene*
aahaalavuliha . . . *axitiithi ni moolumo a maprofeta,*

Mahiku ala ookiserya oonilavuliha ni moolumo a
Mwan'awe, . . .

Ohiira exeeni? “Oonilavuliha mahiku ala ookiserya ni moolumo a Mwan'Awē.”

⁸⁷ Vano, mwaarowa wuupuwela sayi nto, wira, profeta aarowa okhala exeeni? Naamukhalana profeta nto a mahiku ala? Voomalela. Owo aamulavula mwa enamuna yeeyo? Vekeekhai. Masi ole o . . . Maprofeta a mahiku a khalayi yaari Eroho ya Yesu Kristu.

⁸⁸ Vano, nrowe nilakiherye yeeyo, okhala wira nkinoona wira ennikela oratteene. Vano, ela eri ntoko Exikola ya Ttiminku, tivo ninthuna olakiherya yeela. Munnona?

⁸⁹ Nwehe. Nrowe nikuxe Eroho ya Muluku yaari mwa Moise, voolikana e . . . wooniherya khalayi ene wa Yesu Kristu. Atthu othene a Waataana Wa Khalayi yooniherya mwiikimanyo. Moise, aayariwe mwaana ooreerela, aipithihiwe muttheereni, aakumihiwe w'axitiithi awe, ni siiso, ni aari . . . Owo aari mwene, ahiiso mu—muhooli, namavaha ikano, mulapeli, namukuttho. Sothene saary'awe aamooniherya Kristu.

⁹⁰ Nkanweheni Yosefe, oophentiwa n'atiith'awe, oonyokhiwa n'axinn'awe, ni aathummwe ni musurukhu miloko miraru wa eparatha. Aahiriheliwa mulittini, khwaakanyeriwa ntoko ookhwa; khukumihiwa. Molupatthiwani wawe, mulipa-oolawiha yoowurya aahoopowa, namathikila enama khupweteya; anawiiye anli vamwiikimanyo. Vano nto okathi okhumaly'awe, owo aahikhuma mulittini mme, kuheliwa moonoo woolopwana wa Farawo, nakoso muulupalexa . . . e—e—elapo yaaxintta olumwenku wothene mukina. Ni khaavo mutthu aawerya orwa wa Farawo ehikhanle wira yaavira wa Yosefe; Yesu okilante moonoo woolopwana wa Muluku, ni khaavo onwerya orwa wa Muluku ahivinre wa Kristu. Nto okathi Yosefe aakhum'awe veehiceni vale khuneetta, atthu yaarowa ohoolo wawe, enyakulaka ni erumihaka malope, orumiha nlope, yiiraka, “Mukokhore! Yosefe onnoorwa.”

⁹¹ Nto okathi Yesu onrw'awe, nlope ninrowa oruma, nto makutha othene anookokhoro, ni khula nlumi ninoohimya. Ayo, mulopwana. Owo aari vale.

⁹² Nto okathi Yosefe okhwiy'awe, owo aahaahiyerya muupuxeryo ale yaalipelela ovuluxiwa.

⁹³ Kaahihela ntata naka vamukulani wa khalayi, nno woohikhala khalayi, waapakiwe wa mukhulupale. Nto erutthu awe yaahaana okhala . . . makhuv'awe . . . Iirale, “Muhikivithe

wenno, maana nihiku nlo, Muluku onoorowa wooxekuryani.” Owo aari profeta. “Muluku onoorowa wooxekuryani.” Ni khwira, “Mwaarowaka muttethe wa natiri, mukuxe makuv’aka.”

⁹⁴ Khula muHeperi mulweene, aarina ottuli woomaniwa ni w’ephome, aaniwerya oweha mmukulani mme ni wira, “Nihiku nlo, ninrowa okhuma.”

⁹⁵ Yesu oohiya muupuxeryo, mahiye oohikhal’ethhu. Nihiku nlo narowa-ru mmahiye, nto oophentiw’ahu, ni wiiwa ikhomo iye sikhaani, okathi aniir’aya, “Ittuura mwa ittuura, ni ntthupi mwa ntthupini, ni ethhaya mwa ethhaya.” Masi, munna, ninoowerya oweha epantte ekina y’ephareya, mahiye oohikhal’ethhu. Nihiku nlo, ninookhuma mu. Ninoorowa Owaani. Owo onimoorwa. Itthu sothene saahithoonyeriwa.

⁹⁶ Nkanweheni Davidi, aakhoottiwe n’athu awe, ookuruxiwa veehiceni n’athu awe. Ory’ene mwene a oYerusalemu, aahoomoliwa oYerusalemu n’athu awe. Nto okathi waawel’awe Vamwaako Olivera, owo aahiweha vathi khunla. Owo aarookhoottiwa.

⁹⁷ Miyaakha imiya thanu na tthaaru okhuma vaavo, Mwaana a Davidi, Mwene a oYerusalemu, aahikilaathi vamwaako khunla, okhala wira Owo aahikhoottiwa.

⁹⁸ Ele yaari Eroho ya Kristu mwa Davidi. Othene yooniherya mwiikimanyo khalayi ene. Maprofeta ale ottuli wu yaalavula mwa Nsina Nawe. Awo yaakhala mwa Nsina Nawe. Awo yiira mwa Nsina Nawe. Vekeekhai. “Muluku khalayi ni imaara sinci-ene ni inamuna sinci-ene aahaalavuliha axitiithi ni moolumo a maprofeta, masi mahiku ala ookiserya ni moolumo a Mwan’Awe.”

⁹⁹ Tivo maprofeta ni athu a erooho, mahiku ala, t’akhanle mooniheryo mmosa paahi wa Kristu. Iwe, ni ikano awo yaanivenya, yaaniweha. Nno awo anoovenya, ewehaka ottuli iwe, ni mahala.

¹⁰⁰ Eyo eri mw’aHeperi 11, ekapiitulu yookiserya, miyo kinniikohaka eyo imaara sinci-ene. Ekapiitulu yookiserya, epantte yookiserya ya kapiitulu 11 y’aHeperi, okathi onlavul’awe mwaha w’Abrahamu. Ekapiitulu yuulupale ya waamini, wokiseryani, owo iirale, “Awo yaaneetta ewanre-ene isapala sa epwittipwitthi ni isapala sa ipuri, ni yaahikhalihwiwa oohiphwanela, ni yaahiikithanyiwa eriyari. Awo yaaheettasa, ehirina nipuro n’orowa, oonyokhiwa, ni oothanyiwa, ni oolupatthiwa. Yaawo, olumwenk’ula ohikhanly’aya oophwanela athu awo.”

¹⁰¹ Vano Paulo onnivenya khwira, “Masi awo khanreerihiwa voomalela hiyo nihikhanle.” Maana awo yaaweha paahi va mwiikimanyo, ni hiyo ninweha *ovira* mwa mwiikimanyo. Hiyo ninkhalana Eroho ya Kristu numala Eyo okhala erutthu ya

mutthu khukhala ni hiyo. Hiyo nnoorwa va ni Eroho Yowarya, ekhanle etthunelo yooreera saana.

¹⁰² Nto imaara sikina kinniikoha etthu Okristu onweherery'aya olelo. Mulaleyi mmosa aarowaka epooma emosa ohaana okhala. . . ahiiso ekereja emosa esya wala muteko mmosa musya, oniisiihana profeta, onoorowa vale, wira, "Ahe, kavahiwaru musurukhu munci-ene. Kawerya-ru okhalana ekaaro yooreerexa. Awo ya. . . Oliviwa waka wancereriwa-ru khula miyeeri mithanu na mosa."

¹⁰³ Nihaana okhalana yootepaxa oreera. Nihaana okhalana ipa sootepa oreera. Nihaana okhalana ikuwo sootepa oreera. Ninrowa wira exeeni okathi onrow'ahu okhala ohoolo w'axilopwana ale yeettasa, ewaranse-ene isapala sa ipuri ni sa ipwittipwitthi, hata nipuro n'ohela muru aya, yeettasaka mothakoni? Nto mutthu pooti onitheyana ninkhala oolikana wira nittharuwe okereja ni ohitthikela-tho. Etthu entthuna Okristu olelo. Nihaana wuuliwa muru mmansihu.

O Muluku, animorele ikharari.

¹⁰⁴ Nihiku nle, Owo aalavunle ni moolumo a maprofeta, masi nihiku nla mwa Mwan'Awe. Nle naari nuulumo na profeta, iwe. Ala Masu a Mwaana, olelo. Oh, nntotopeliwe nsina n'Apwiya!

¹⁰⁵ Mwa moolumo makina, mwaawehaka eruku, enekatiivu, pooti ovonya. Masi Ela ti yowuunuwa, elatarato ti yoowooneya. Ele yaari ni profeta; ela ti ni Mwan'Awe. Ele yaari enekatiivu; ela ti epositiivu. Amen. Munnoona yeeyo? Khiivo enamuna yo ohaleela. Eyo etthu y'ekeekhai, nihiku nla mwa Mwan'Awe. Oh, ti yooreerexa!

. . . *yoowo omuhiyenry'awe*. . . (Oh, wulu!) . . .
omuhiyenry'awe itthu sothene, . . .

¹⁰⁶ Yaari exeeni iyo? Yaari elaihanelo. Oh, mwiiwe. Owo aahilaiheriwa, Kristu aari, murithi a itthu sothene. Oh, xetwani aahisuwela eyo, okhuma omatta w'Edeni, moone, xetwani vaiwaly'awe Masu awo iwe nihiku nle, w'ophukiwani w'atthu ale. Khwira, "Okhala wira mukhumme mutthayani, munootthikela mutthayani; nto Osuulu wa muthiyana onoonyakela muru w'enowa." Osuulu woolaiheriwa.

¹⁰⁷ Satana kweekwe aaniweha Osuulu uwo. Okathi Apeelee oyariw'awe, owo iirale, "Owo vo, ole t'usuulu." Vano owo khumwiiva Apeelee. Mwan'awe, Kayini, khumwiiva Apeelee. Vakhwiw'awe Apeelee, owo khwira, "Koomaliha osuulu ene." Owo khumwiiva. Owo khwira, "Koomaliha." Masi, okhwa w'Apeelee, oyariwa wa Sethi waari ohihimuwa-tho. Nwehe moota jaarwans'aya.

¹⁰⁸ Nikhuru nle na Sethi, naarwiiye, nowiiyeviha, mutthu a exariya; erowaka ovira mwa Enokhi; erowaka mpakha Nowe, mpakha wookiseryani wa ohonona wa mutaseke.

109 Nkawehani nloko na Kayini, naakhanle atthu oocencera, oosoma, siyensiya. Bibilia khonihimya wira . . . Yesu khohimye, wira, “Aana a molumwenkuni mu t’osuwelexa waavikana Aana a Momweneni”? Nkawehani epantte ya Kayini mpakha olelo: oocencera, oosoma, oohaamini, anatiini saana; moone, anatiini saana, masi anasiyensiya, anamateka, atthu aalupale.

110 Mwaatthokelele atthu aalupale. Nkanweheni Thomas Edison, atthu aalupale anci-ene. Nkanweheni Einstein, ankhili a molumwenkuni, ntoko onihaniw’awe, olelo, ankhili a molumwenkuni. Masi hiyo khanineererya orumeela ankhili. Hiyo nintthuniherya Muupuwelo waari mwa Kristu okhala mwa hiyo, ni oweha Masu ala, ni wihana siiso.

111 Matothoro a mirette, ninamwi naattotopelaka ni sothene sirin’ahu, masi anci-ene aya t’ohovela, oohimwaamini Muluku. Nkaaweheni atthu oocencera ni oosuwela olelo. Awo ari epantt’ile iwe, epantte ya Kayini.

112 Masi nkaaweheni ale oowiiyeviha ni oomaala. Vo ori ohihimuwa wanyu tho. Oh, nttotopeliwe Nsina n’Apwiya! Eyo vo. Nwehe.

. . . owo oomukhaliha *murithi a itthu sothene, nave-
tho mwa yoowo opattuxannyawe olumwenku;*

T’ani opanke olumwenku? Kristu. “Kristu oopaka olumwenku?” Ayo, mulopwana. Nikelele ohoolo vakhani.

*Yoowo t’ori waarya w’ovuwa wawe, ni elatarato
yoomalela ya mukhalelo awe, . . .*

Waarya wa ovuwa w’Ani? Ovuwa wa Muluku. Elatarato yoomalela ya Mukhalelo w’Ani? Wa Muluku. Oh, okisivela ela!

. . . wala *elatarato yoomalela ya omutthu awe, ni
t’onlipiha itthu sothene ni moolumo . . .*

Eyo vo. Masu, anlipiha itthu sothene. Yesu oohimya, mwa Matewu 24, “Erimu n’ilapo ya vathi sinoovira, masi Masu Aka khanvira.” Owo onnilipiha itthu sothene.

113 Siyensiya oneererya okuruxa Eyo, ni wira, “Eyo Eliivuru ya khalayi. Yootaphuleliwa.”

114 Hata ekereja Katolika y’oRooma, Pixipu Sheen iirale, “Yootaphuleliwa imaara xexe wala thanu soovirikana, ni kherina efayita Eyo. Khimwaakhanle okhalaka ni Yeeyo vakhala wira mwaahaana.” Masi Owo t’onlipiha itthu sothene ni Masu Awe. Amen. Ti yeeyo enuupuwel’aka wa Yeeyo. Kinnimwaamini Bibilia.

. . . *moolumo oowerya wawe, (wookhala owerya
Mmasuni), numala mwa yoowo oreeriha itampi
sahu, . . . (nkawehani va) . . . ookilaathi moonoo
woolopwana wa Oowerya sothene wirimu-rimu;*

115 Paulo omphavela wira exeeni? Owo omphavela wooniha wira Muluku ohelenle itthu sothene mwa Kristu, ni Kristu aari elatarato ya mukhalelo wa Muluku. Ekapiitulu enihala yothene enihimya moota Owo aary'awe mukhulupale ovikana Malaikha, mukhulupale ovikana ikuru sothene. Malaikha yaahimukokhorela. Paulo aaphavela omunnuwiha Yoowo.

116 Vano, kintthuna keererye...Kaahikelele ohoolo ovikana yeela, ele enihala omunnuwiha Kristu paahi. Etthu Paulo enihimya'awe va, ntoko kapiitulu 11, ni sothene sa olavula mwaha w'olumwenku. Owo iirale, "Nla—nlaikha xeeni Owo otonkw'awe ohimeerya wira, 'Nyuwo mwa Mwan'Aka, Miyo kooyanreni olelo?'" Munnona?

117 "Emalelo y'olumwenku, awo anoopweteya. Olumwenku onoopweteya. Masi e...Ni itthu sothene sa molumwengkuni sinoopweteya. Owo onimwaakhuna ntoko ekuwo. Awo animuuluvala, ni anookhoottiwa, ni anoolakaseya. 'Masi Nyuwo munookhala. Munookhala mahiku othene. Nyuwo mwa Mwan'Aka. Miyo kihooyarani olelo, ni khamunrowa opweteya, ookilaathi moonoo woolopwana a Oowerya sothene.'"

Exeeni enihimya *moonoo woolopwana*? Kahi, wira Muluku orina moonoo woolopwana mutthu okilanth'awe-vo. *Moonoo woolopwana* enihimya "owerya ni okhulupale," okhala okhulupale wa itthu sothene Wirimu ni vathi. Nto Erimu yothene ni vathi sipakiwe ni Yoowo.

118 Vano, T'ani okhanle Mutthu muulupale, Mutth'ula muulupale, Kristu? Va, Muluku mwa Tithi, Mwaana, ni Eroho Yowarya, kehiyo...Owo oraaru, masi Owo kuhiyo oraaru w'atthu. Owo oraaru wa muteko, wa Muluku mmosa.

119 Owo aari Tithi oweettihaka aana a Isarayeli. Owo waari muteko Awe, Yehova Tithi muulupale. Ni Owo aakhala elapo ya vathi, iihaniwa Mwaana. Nto vano Owo onkhala Mukereja mw'Awe, onihaniwa Eroho Yowarya. Kahi aMuluku araru; Muluku mmosa mwa miteko miraru: Tithi, Mwaana, ni Eroho Yowarya.

Atthu aneererya omukhaliha Owo aMuluku araru oovirikana, Muluku Tithi. Mwaha wa yeeyo, aYuta, khimwaakhanle, khamunrowa omuruuhela yoola muYuta, nnari, yeeyo vo. Owo khonwerya. Owo ookhalana yooruma, wira, "Miyo ka Muluku Mmosa." Ori Muluku mmosa paahi.

120 wAfrika atthu ampatisa inamuna tthaaru soovirikana: awo ampatisa omosa wa Tithi, ni omosa wa Mwaana, ni omosa wa Eroho Yowarya. Misawu sa Waamini w'Arummwa, awo ampatisa vaara vararu, wiitho awehaka ohoolo, mwaha wa okhwa Wawe. Yeeyo aniihan'aya Ehapari yooreera Yoomalela Olimani Onkela nsuwa, ahiiso Olimani Onkhuma nsuwa, ampatisa vaara vararu aroiha ottuli, aniira Owo...mwaha w'ovithiwa Wawe.

Nto owo iirale, “Okathi Owo okhwiy’awe, Owo aamorenle wiitho.”

¹²¹ Mukina iirale, “Mulipelele. Nyuwo muninvitha mutthu ottuli wawe.” Iyo itthu sikhaani s’orattela, okathi, oowanli aya aavonya; oowanli aavonya, vootthariha Soolempwa.

Ola ti Urimi Tumimi. Onnimaliha mwaha.

¹²² Vano, va, nrowe noone elatarato ene ya yeeyo ni noone etthu—etthu enlikanan’aya, ohiy’ula. Ela eri va, mwatthuna vale woona. Mwa miyaakha sothene miloko miili kikhany’aka murumeyi, miyo kinnisomaka eyo. Ni imaara sinci-ene kaanitikinihiwa ni soovaha mukereja. Soovaha iyo exeenii? Olaleerya s’oprofeta, olavula ilavulelo, otaphulela ilavulelo, muupululo w’eMuluku, ni sikina, sothene iyo sinrwa sivraka mwa Kristu.

¹²³ Vano nkawehani. Kristu t’okhanle Muru wa itthu sothene. Ni Owo ti Muru wa Ekereja. Nto nyuwo mootoko omoona tiyamante muulupale? Tiyamante muulupale othikiliwe oratteene, ookhalana mirere mikhaani sithikilasiwe vaavo, sithikilasiwe vaavo. Eyo t’enimukhalia tiyamante ooloka. Ithikileliwo ti sa xeeni? Tiyamante eekeekhai, enamuna ninkhum’aya, noomanakasiwa; tiyamante eekeekhai, okathi omphwanyiw’awe.

Miyo kaari oKimberley. Nyuwo, anci-ene a nyuwo, muhiiwa wira pooti ottottiwa tiyamante mphironi, eyo eekeekhai. Billy ni miyo, ni Mwenye Bosworth. Mukhulupale a mikoti sa tiyamante a oKimberley, aahikuxa. . . Owo aari namatthokiha aka vamuthukumanoni iwe. Nto awo yaaroniroiha weiwo. Nto paahi wa. . . Awo ankumiha ntoko, oh, ntoko imeeturu imiya thanu ni muloko ni thanu na tthaaru vathi v’ethaya. Ankhuma ntoko, nliku noopipila, nuulupale noopipila, ntoko nliku nla noopipila mumphwanyanyu nno. Nto axineene ale, awo anhela imeeturu imiya thanu ni muloko ni thanu na tthaaru vathi, wira ethipe, wira aweliheke ehisapo. Nyuwo mwaamurowa omuro iwe, awo anookhapelela ewehawehaka imiilya imiya sene. Mukuxe micoma miili sa iliituru thanu ni nuusu, owo khwira, muttote, soosareya mi—soosareya mihaava, nto mwawerya-ru ophiya owaani ni seiyo, mwaamukhala thaaciri a imilyawu, yaamukhala atiyamante anci-ene memmo. Masi awo ahaana ovara muteko ni othipa, wira eweliheke ehisapo aya.

¹²⁴ Vano, tiyamante, akhuma vale, onkhala nuulupale, oothererya, oovilikeya, ntoko, nipattuusa n’eviituru. Ookhala tiyamante oopipila, tiyamante ooriipa, esmeralta, tiyamante oowooneela, tiyamante ootteela. Masi nakhuma vale. . . Nto napakiwa vale ni khunarumeliwa, yookhala epantte ya tiyamante owo erina orimeela. Ni nihaana orimeela i—ithikilelo saya. Ninoothikiliwa ikapatti sikhaani, okhala wira, naarwaaka vowaaryani, *sisiso*, ninkumiha eyaarelo. Ethikileliwo, t’enkumiherya waarya, enamuna onthikiliw’aya. Onoothikiliwa,

ohotthiwa, vano nto, nairihiwa siiso, onkumiha eyaarelo. Nto mmosa onookumiherya waarya wooripelela, mukina onookumiherya waarya woopipila, ni khino mukina, waarya esmeralta, waarya wooweerya. Ni iyaarelo soohiyana-hiyana sinookhumela, ntoko nthepa na ekhweyi. Nniihaniwa, “mooro muhina mwa tiyamante.”

¹²⁵ Vano, khula nimosa wa waarya iwe onthoonyerya soovaha. Masi ti, paahi, Kristu t’okhanle Tiyamante. Ni Owo t’Ule aarwiye, ni khuhaaxiwa, khunyakattiwa, ni khuthikilasiwa, wira Owo ooneele mwa Yoowo ntoko Waarya molumwenkuni. Owo t’okhanle Tiyamante Muulupale.

¹²⁶ Mwaamuwerya otthokelela, ehinatthi hata okhala elapo, ohinatthi okhala waarya, ehinatthi okhala ettheneeri, ehinatthi okhala hat’etthu? Yaahikhala Ephattuwelo Yuulupale yaakhwalala, ya Eroho, ni v’Ephattuweloni vaava waahikhuma mphento woolokaxa, okhala wira khiyaakhanle hat’etthu wira ekhume vaavo woohikhala mphento. Vano, hiyo, ele eniihan’ahu mphento, olelo, mphento woohononiwa. Masi vamphwanyahu ekhalelo, wala mphento yoowo vakhani mwa hiyo, onoorukunxa muupuwelo wothene.

¹²⁷ Vano vaavale yaahikhuma evirelo ekina, v’Ephattuweloni yeela yuulupale, Tiyamante, nto yihaniwa exariya, exariya voomalela. Vano, mwaha wa yeeyo hiyo waarin’ahu okhalana ikano. Mwaha wa yeeyo ikano sihaana okhalana ehukumu. Yaahikhale ehukumu entthara ekano, ekano kheniira etthu. Nto okathi ehukumu yavaheriw’aya mwaha wa ekano, yeeyo eniruha okhwa, nto khaavo hata mmosa aawerya oliva ehukumu woohikhala Muluku Mwaneene. Nto Owo ooliva ehukumu ya okhwa wahu, ni khukuxa itampi sahu mwa Yoowo, wira hiyo nikhale exariya ya Muluku mwa Yoowo.

¹²⁸ Vano, okathi Waarya nno wuulupale okhumaly’aya, ahiiso mirayi suulupale sa Eroho: mphento, murettele, eyo yaari yothene yaakhanle, Yeeyo. Khiwaakhanle hata ohaawa. Khiwaakhanle hata—hata onyokhana, nnakhala otakhala; khivaaweryaneya okhuma v’Ephattuweloni yeela. Owo aari Yehova. Owo aari Yehova Muluku. Nto vano, ntoko mateyooloku sinihan’aya, teyofaniya yaakhumme Memmo, yeeyo yihaniwa, mwa Yoolepwa, “Logos,” Logos yaakhumme wa Muluku. Ti yoolipa otaphulela, masi Eyo yaari epantte ya Muluku.

¹²⁹ Vano, ela ti yaakhumelenle. Oh! Kileveleliwe. Ki—ki—kinookela tu mwa yeela, ela enookikeliha vaavale onkisivela. Munnona? Logos, nto Ephattuwelo yeela yuulupale, Ephattuwelo yeela yuulupale ya Eroho yahaarina epacerelo nnakhala emalelo; Eroho ela yuulupale yaahipacerya opaka, woopattuxani, ni Logos yaakhumme wa Yeeyo aari Mwaana a Muluku. Yaari ekhalelo emosa paahi yowooneya Eroho

yaarin'aya. Ni Eyo yaari teyofaniya, yeeyo enihimya erutthu, nto erutthu yaari ntoko mutthu.

¹³⁰ Moise sahoona okathi Eyo yaaviraly'aya va . . . va—vamwala. Nto owo aahiweha, khwira, “Eyo yaakhala ntoko epante y’ottuli ya mutthu.”

Muthinto mmosaru w'erutthu onaakhel'ahu okathi onkhw'ahu nno. “Emp'ela ya vathi yakurumuwa, nihaana ekina ennipelela.” Eyo yaari Yeeyo. Nto eyo yaari teyofaniya aari Mwaana a Muluku. Mwaan'owo, Logos iyo, khukhala erutthu, okhala wira hiyo naaheliwe mw'erutthu. Nto teyofaniya, Logos, khukhala erutthu, va ni hiyo, ni Eyo khiyaari etthu ekina woohikhala nipuro n'okhala, maana Ephattuwole ele yothene yaakhala mwa Yoowo. Oh, munnoona eyo? Eyo eri vo. Owo aari Ule, a, mwa . . .

¹³¹ Nkawehani va. Nrowe vano nikhunle voowaakuva aHeperi, kapiitulu 7, okathi vakhani paahi wa—wa mahala, Muluku athuna vale. Nrowe noone etthu enlikanan'aya va. Abrahamu!

Nirina okathi mukavi? Nihaana minuutu muloko. Vaareera. Nivare ela, nto ninoomaliha voottharana, voottharana, wala Ttiminku, Apwiya yatthuna vale.

¹³² Abrahamu aamuhokolowa akhumaka waamwiiv'awe mwene.

Tthiri Melikisetekhi ula, mwene a oSalemi, . . .

Akavi ansuwela nipuro, t'ani, ele yaari Salemi? Yerusalemu.

. . .mwene a oSalemi, namukuttho a Muluku a wirimu-rimu, aakumanne n'Abrahamu okathi aahokolow'awe waawiiiv'awe mamwene, ni khumureerih;

Nwiriyane.

Yoowo Abrahamu anvahaly'awe ya namuloko ya itthu sothene; yoopacerya nikhandle nootaphuleliwa Mwene a exariya, . . . nave-tho Mwene a oSalemi, okhanle, Mwene a murettele;

Oohikhalana tiithi, hata maam'awe, nakhala nloko, nakhala oohikhalana opacerya wa mahiku, hata emalelo y'ekumi; . . .

¹³³ Mwene mmosa aakhumme oSalemi, nto khukumana n'Abrahamu akhumaka waawiiiv'awe mamwene. Nto Mwen'ola khaarina tiith'awe, khaarina maam'we, khaarina opacerya wa mahiku wala emalelo y'ekumi. Abrahamu aakumananne aani? Vano muupuwele. Owo khaarina hata tiith'awe; Owo khaarina hata maam'awe. Owo khonatoko okhalana okathi Owo opaceny'awe, ni Owo khorina hata okathi onrow'awe omala, siiso-tho Mwene yoowo a oSalemi ohaana okhala mukumi olelo. Amen. Munnoona yeeyo? Yaari teyofaniya

yeeyo yaari Mwaana a Muluku. Salemi xeeni? Yerusalemu yoole ori Osulu, Abrahamu, ory'ene ooreerihwa, aaphavel'awe, ophwanya, ophavela ophwanya Muttethe yoowo Namateka ni Namapaka aari Muluku. Owo aaheettasa owanre-ene isapala sa epwittipwitthi ni isapala sa epuri, mapuro othene, oothoiwa, eettasaka, ni aphaavelaka Muttethe yoowo Namateka ni Namapaka aari Muluku. Vano owo aahikumunana Mwene a oSalemi iwo, arwaaka, nto khimuliva ya namuloko ya itthu sothene. Amen. Ti Yoowo. Oh, Munna Graham, aari Yoowo. Owo aari Yoowo.

Abrahamu aahimoona-tho Owo. Nihiku nimosa owo aakilanthe muheemani. Owo aahiweha, arwaaka iwe, ni aahiwoona axilopwana araru arwaaka.

¹³⁴ Moosuwela, yookhala etthu mwaha wa muKristu, wira owo onnisuwela Eroho okathi onoon'awe Yeeyo. Okathi owo. . . Owo onnisuwela tu. Yookhala etthu ya Eroho ya yeeyo. Itthu sa Eroho sinlamuliwa ni Eroho. Moosuwela. Ayo, owo onniwerya osuwela, vakhala wira vekeekhai ooyariwa. "Ipwittipwitthi Saka sinnisuwela Nsu Naka."

¹³⁵ Nto owo aanisuwela tu wira yaahikhala etthu. Owo khukhuma khwira, "Nvolowe, Pwiya'aka. Mukilaathi. Mweemele vakhani. Kinoorowela mukatthe kihele mmatatani mw'Anyu. Kinoorapiha inawu Sanyu. Mmumule, vano mutthikele mukwaha Anyu, maana Mu—Muhoorwa okixekurya." Ory'ene iwe elapo yoohiruwerya, okunxe-ene ephiro yoorika, ephiro n'ale vakhani oothanyiwa a Apwiya.

Okathi, Lothi aakhal'awe ni mihakhu, musulu awe ohitto iwe, masi owo aakhala mutampini. Ti yeeyo othaaciri vanci-ene oniruu'aya etampi.

¹³⁶ Tivo Abrahamu aaruuhaly'awe, arowaka okuxa maasi vakhani wira arapihe inawu Saya. Owo aahimutthimakela mwaanyompe, khimukuxa mwaanyompe ooneneva munikotoni, khumwiiva; khunvaha murumeyi, wira amuluke. Nto khwira, "Sara, mukhatte otthu anyu."

Moosuwela etthu okhatta, eyo e, enihimy'aya. Moosuwela, amaama yaanikhalanaka, ntoko exereryo ya khalayi, awo yaapwehak'aya mmwa—mmwaapuni wa otthu. Mootoko wona emosa ni ethokwa? Ni yaakhalana exereryo emosa muhina mme, mwaakwesery'anyu otthu, moosuwela; n'ukhaliha woolemelela *siiso*, n'ukweserya, *siiso*. Kaaniwoonaka amaama yiraka, imaara sinci-ene, exereryo, yaahikhalana etthu yaamukhaani yoovilikeya erina munlaano mukhaani w'araame. Awo yaanikuxa otth'ule n'uveera *siiso*, moosuwela, n'upapatthela nno ni nno, *siiso*. Vano n'ukuxa exereryo n'ukweseryasa, *siiso*, wira opataane. Nto waari okathi waarin'ahu orowa okuxa otthu ahu n'uxila vanxiloni na khalayi na enuku; ni maxilo maalupale a khalayi, moosuwela, oolemela, yaanipakeya

mukatthe w'eekkehai wa nakhuwo. Mwaamuwerya okhera matoro nihiku nothene, mukhuuraka yoowo.

137 Tivo nto, khwira, "Mukhatte otthu vakhani, mwaakuveke. Mpake mikatthe kamosa-kamosa vaikho vaava, mwaakuveke." Vano awo khuwama enyompe khukumiha eleethi. Nto khupaka, khweethaya, khukhalana manteeka. Vano nto khurowa khumwiiva mwaanyompe khukhalana enama, khwaarika ni makhura enam'eyo. Khukhalana manteeka a eleethi, mukatthe wa nakhuwo, ni khukhalana manteeka wira ehele mmikattheni sooviha. Oh, ti yoosiva saana. Vano awo khootowelasa yothene eyo vale. Nto owo khukumiherya vate, khwaapweherya Axilopwana ale araru.

138 Nto okathi Awo waalyaas'aya, Awo yaakhala eweahasaka oSotoma. Nto nuvira okathi vakhani, Awo khuyenyasa khupacerya weetta erowaka. Nto Owo khwira, "Abrahamu. . ." Khwira, "Nyuwu khamunrowa okiipithiherya miyo."

139 "Nkikhanle owiipithiheryani etthu enrow'aka wira. Kinrowa iwe. Itampi s'oSotoma sookiphiyerya owaruni Waka."

Aari Pani Mulopwan'owo? Ntthupi ikuwo Sawe sothene, ni okilante-ene vale akhuuraka enama ya mwaanompe, ni awuryaka eleethi y'enyompe, ni akhuuraka mukatthe wa nakhuwo, ni manteeka. Ti pani Mutth'uwo mmalapo? Anli, wala araru Aya, ekilante-ene vale. Ntthupi mwa ikuwo Sawe sothene. Oh, ayo, "Hiyo ninkhuma Elapo emosa ottaiwene." Ayo, ottaiwene saana. Nto tivo Owo khwira. . . Ahe, T'ani Ale?

140 Owo khwira, "Nkikhanle omwiipithiheryaka Abrahamu, woonaka wira owo ti murithi a elapo." Amen. "Kinimuupulula isiiri Saka," moolumo makina, "w'ale akhanle alipa-oorithi elapo." Ti vaavo Ekereja yaatthuney'aya okhala olelo. Ti yeeyo. Ophwanyisa Isiiri sa Muluku, osuwela moota wo wiiseetiha mmansinyu, ni wira, ni etthu yo wira, ni moota wo weetta, ni moota wo okhala. Hiyo n'alipa-oorithi elapo. Khweeli. Owo onniwuupululelani Yeeyo, okhala wira Owo khonrowa wiipithiha hat'etthu. Tivo hiyo ninweh'ahu itthu wiiraneya.

Olumwenku oniira, "Ahe, nle nikhuru n'anamathipelela." Mwaahiye ehimyeke. Murithi a elapo onnisuwela itthu iya. [Nipuro vahiiitthu mufiitani—Mol.]

. . . *okhala wira animwiihaniwa aana a Muluku.*

Ooreeriwa t'ale oowiimaaliha: okhala wira animwaakhela elapo yoohiyeriwa.

Owo onnaasuweliha isiiri Sawe, onniwuupululela awo, owoonihaka etthu yo wira ni moota wo okhala, ehityaka itthu sa molumwenkuni; yeettaka vooreera murima ni ekhalaka vooreera murima, olumwenku ula wa vano, yeettaka ni Yoowo. Muhiye olumwenku ohimyeke etthu antthun'aya.

141 Tivo Owo iirale, “Nkikhanle omwiipithiherya esiiri ila Abrahamu, okhala wira, woonaka wira owo ti murithi a elapo. Masi,” Owo iirale, “Kinrowa iwe kahonone elapo y’oSotoma. Miyo kinoorowa-wo.”

142 “Munrowa wira exeeni, Mwenye? Nyuwo mw’a woowi? Sothene iya sinihimya-ni?”

143 Rwaakani musuwele, Owo khwira, “Ni etthu ekina, Abrahamu, moomulipelela miyaakha miloko miili ni mithanu natiri ula koomanenly’akani. Mootthokiha ikuwo sothene sa mwaana, i—ikwaaco ni itthu sothene, sa mwaan’ola, miyaakha miloko miili ni mithanu sivinre. Nyuwo nlelo munikilipelela Miyo. Vano Miyo kinrowa wooxekuryani, okathi w’ekumi, kittharihaka, okathi w’ekumi, mweeri onrwa Miyo kinookhala ni nyuwo.”

144 Vano Saara, wiithela muheemani. Nto Mutth’ula aahirukunuwela ettuli Awe eheema, alavulaka ni Abrahamu, so. Nto Saara khwira, “Huh!”

145 Owo khwira, “Exeeni emutheihale Saara?” Ho-ho-ho! Ankhi yeeyo? Iwe waari evaanelelo ya miyuupuwelo, kahi siiso? “Exeeni emutheihale Saara?”

Saara khwira, “Nnari. Miyo nkitheyale.”

146 Khwira, “Oh, ayo, mootheya.” Owo aahituthuwa. Owo aamuthukumela. Aari pani Uwo, aawerya osuwela etthu owo aavar’awe ottuli muheemani? Ole ti Muluku mmosaru ori ni hiyo olelo. Mmosaru Yoole. Owo onnisuwela sothene. Munnona? Owo onnuupulula ntoko simphavel’anyu. Munnona?

147 “Muntheya mwaha wa xeeni?” Moone, ettuli Awe orukunuwenle-ene yeeyo. Bibilia oohimya eyo, wira, “Ettuli Awe aarukunuwenle eheema.” Masi, Owo aahisuwela. “Etthu owo, ary’ene ottuli, airaka *yeela*?” Munnoona? Tivo, Owo khwira, “Miyo kinoorowa wooxekuryani.”

148 Ti pani Mutth’uwo mmalapo? Moosuwela yaakhumelenle? Owo aahikhuma eettaka khulakaseya. Ni Bibilia ohimye wira Ole aari Muluku Oowerya sothene, Yehova, Ephattuwelo yeele yuulupale, Teyofaniya yeele, Logos yeele.

149 Mulaleyi mmosa aahikiirela, okathi uwo ovinre, khwira, “Munna Branham, vekeekhai nyuwo khamunuupuwela wira ole aari Muluku, ti siiso?”

150 Miyo khwira, “Bibilia ohimye wira Ole aari Muluku, Elohim.” Yoowo, Ole aari Muluku Oowerya sothene, El Shaddai, eyo ekeekhaii, Namavaha Ikuru, Ole oosiveliha. Amen.

151 Oh, kinnoona okhala natiini! Nkuupuwelani yeeyo. Va, Owo ori va. Vano kinrowa owoonihani ti Pani Owo va, vano munimoona Ole okhanle Mwaana. Ole aari Yesu, Owo ohinatthi okhalana Nsina na mutthu, “Yesu.”

152 Eemenle vale vephattuveloni nihiku nle. Nto awo othene yaamuwurya, moosuwela, ni, “Ekhalanaka maasi yaari mothakoni,” ni itthu ntoko seiyo. Owo khwira, . . . Awo yaalya emana ni itthu. Awo yiirale, “Axitith’ihu yaahilya emana mothakoni, miyaakha miloko mixexe.”

153 Owo khwira, “Nto awo, othene, ahookhwa.” Khwira, “Miyo ka Yolya y’Ekumi ekhumme wa Muluku, a Wirimu. Ole onlya Yolya ela khankhwa.”

154 Khwira, “Ahe, axitiith’ihu yaahiwurya va Eroho, Vamwala wa erooho waari mothakoni, waatthara.”

155 Owo khwira, “Miyo ka Mwala yoole.” Ovuwa! Yohani Oowaarya, kapiitulu 6.

“Vano,” awo khwira, “exeeni?”

“Ayo. Ti yeeyo.”

156 “Vano,” owo khwira, “Nyuwo mwa . . . Nyuwo khamurina hata miyaakha miloko mithanu.” Vekeekhai, muteko Awe waanimwiiraha okhala ntoko muulupale vakhani, masi Owo aarina miloko miraru paahi. Khwira, “Nyuwo mwa mutthu muhirina hata miyaakha miloko mithanu, nto muniira moomoona Abrahamu, yoowo okhwiye mwa miyaakha imiya thanu na thaaruu wala thanu na xexe? Hiyo noosuwela vano wira mwa xetwani.”

157 Owo khwira, “Abrahamu ahinatthi okhala, MIYO KOOKHALA.” Owo vo. T’ani aari MIYO KOOKHALA? Nsina noohimala-mala na maloko othene. Nlo naari n . . . Nlumi nenle na Mooro vamwiiwani waavarela, “MIYO T’ULE KINKHALA.” Owo aari vale, Teyofaniya yeele Owo aapakaly’awe va, yiianiwa Mwaana a Muluku, MIYO KOOKHALA, Yehova.

158 Tome iirale, “Pwiya, munoonihe Atithi nto vanooniphiyerya.”

159 Khwira, “Miyo kinkhala ni nyuwo okathi munci-ene, nyuwo khamunkisuwela?” Khwira, “Mwaakoonaka Miyo, muniwoona Atithi. Xeeni wiiraka, ‘Munoonihe, Nyuwo, Atithi?’ Miyo n’Atithi nri Mmosaru. Atithi Aka ankhala mwa Miyo. Miyo k’empa paahi eniihaniwa Mwaana. Atithi ankhala mwa Miyo. Nkihiyo Miyo kinvara miteko, t’Atithi Aka ankhala mwa Miyo. Awo t’anvara miteko, kahi Miyo.”

160 Vano, eemenle-ene tho, iwe, Moise aahimoono Owo, epantte Awe y’ottuli, khwira, “Aakhala ntoko muthana wa mutthu,” Logos yaakhumme wa Muluku.

161 Vano exeeni yaakhumelenle? Ola aari Muluku. Nto etthu Owo aarwenly’awe okhuma Logos khukhala erutthu . . . Exeeni . . . ? Muniira sayi . . . ? Exeeni yiiranen’ye ni yeeyo? Minuutu mithanu eyo ehinatthi, Owo aari e . . . Owo aari Logos. Masi Owo iirale exeeni? Owo aakuxela paahi . . .

162 Vano, irutthu sahu simpakaniwa itthu muloko ni thanu na mosa soovirikana sa olumwenku. Hiyo noosuwela eyo. Empakiwa ni epotaasiyu, ni—ni e—ni ekalsiyu vakhani, ni—ni patarootya, ni waarya wa olumwenku, ni atomu, ni sikina. Sothene sootakanxana, simpaka erutthu ila, enkhuma vatthayani v'elapo. Nyuwo munlya yoolya. Vanly'anyu yoolya, eyo enkhala e...okhuma vatthayani, nto eyo enkhuma vatthayani, nto eyo paahi—paahi enoottthikela erowaka. Erutthu anyu, ntoko erutthu anyu, khevirikanne n'ikhavalo, wala enyompe, wala etthu p'itthu ekina. Eyo nlelo erutthuu.

163 Nto, moone, nyuwo munvuwiha erutthu; masi erooho eyo yookhalana munepa mmo, munn'aka. Eyo ekeekhaii. Masi erutthu anyu ethhaya paahi ya vathi, ntoko enama. Erutthu anyu kehiyo etthu ovikana enama. Nto nyuwo mwanlelaka itthu s'erutthu ni etthu munoon'ahu, osivelasiwa n'athiyana, osivelasiwa itthu iya sothene soohiyana-hiyana, nlelo onkhala onama. Eyo ekeekhaii. Eyo ekeekhaii. Muhiireke. Eroho ya Muluku enooweetihani ni woohelani nipuro n'osulu ovikana eyo. Eyo ekeekhaii voolikana.

164 Vano, nto va, Teyofaniya ela yuulupale yaaphwanyaneya iwe. Exeeni . . . Muluku ule Yehova muulupale, moosuwela etthu Owo aahimaly'awe? Owo ookonle ntata khukuxa nikuphi n'atomu, khukuxa waarya vakhani, khuyeeherya eyo mme, ntoko sa, khwira, "Whish," erutthu, nto khukela-mo. Ti yeeyo tu.

165 Khwira, "Murwe va, Kapiriyeli," Nlaikha nle nuulupale. Khwira, "Wish." "Mukele *mme*."

166 "Murwe va, Mikhayeli," Nlaikha na moonoo Awe woolopwana. "Wish." Wa e . . . "Mukele *mme*."

167 Muluku, ni Malaikha manli, yaaheetta vathi va mw'erutthuni ya mutthu, khiwurya eleethi ya enyompe, khulya manteeka oopakiwa ni eleethi, ni khukhuura mukatthe wa nakhuwo, ni khukhuura enama ya mwaanyompe. Malaikha manli ni Muluku. Bibilia ohimye siiso. Owo ti Melikisetekhi Abrahamu aakumanann'awe, akhumaka waawiiw'awe mamwene. Owo ti Mwaana a Muluku.

168 Mukelele ohoolo, va mw'aHeperi, 7, yiraale, "Masi oopakiwa alikanaka ni Mwaana a Muluku." Owo vo. Owo oopattuxa itthu sothene mwa Yoowo. Nto Owo aaheetta iwe, khurunkuxa ethhaya ele otthikela-tho ethhaya, nto khweetta aththikelaka Movuwani.

169 Vano Malaikha, Awo emalaka-ru onvuluxa Lothi ni Muhano Lothi, nto owo aatthikela awehaka ottuli. Owo khwira, khwaaleela wira ehiire-tho. Vano Awo naanaanoru khutthikela ekelaka o—Ohoolo wa Muluku.

170 Vano, nrromelo xeeni muulupale orin'ahu mwa Waamini nno wuulupale hiyo onrumeel'ahu ohiy'ula! Muluku mukumi, Yehova, Nlumi na Mooro, ori ni hiyo. Onniisooniha Mmansawe mwa owerya, ni wira, ni wunnuwiha . . . Ootthuniherya

okumihiwa elatarato Awe, Yehova yoowo mmosaru. Mwaana a Muluku aakhumme wa Muluku, khutthikela wa Muluku, ni onkhala muKereja mw'Awe voohimala. Owo vo.

171 Owo ookhalana masin'ahu Muliivuruni mw'Awe, ni elaphelo olamph'awe Mmansawe, maana khaavo muululupale Owo okhanly'awe omulaphelaka, wira Owo onoonihihimuxa nihiku nookiserya. "Ole onlya Erutthu Aka, ni onwurya Ephome Aka, ookhalana Ekumi, ni Miyo kinoomuhihimuxa nihiku nookiserya. Ole onrwa wa Miyo, Miyo nkinimurihela ota hata mano. Ole oniwa Masu Aka, ni onimwaamini Ole okirumme, onookhalana Ekumi ehinimala, ni khanrowa olamuliwa, masi oovira mookhwani khuphwanya Ekumi."

172 Yoowo Ene aaniwerya wookola moonoo khukuxa nikuphi na ekalsiyu ni potaasiyu, khwira, "Wish," nto muri vo emaara ekina. Nto nsina naka niri Muliivuruni mw'Awe. Ho-ho! Ho-ho-ho-ho! Kincala-ni wira makhata aka aakhurupuwa, kuuluvanle sayi? Vekeekhai nnari. Nkinvela-vela hata vakhani.

173 Munna Mike, nimosa wa mahiku awo, ottotopeliwe murim'anyu, munna, okathi nlope nuulupale nirow'aya orwa, oruma iwe, ni Yosefe onrow'awe okhumela. Aleluya! Owo onimwiira, "Aana!" "Whish." Hiyo ninookhala vale, oolattana ni Yoowo; amiravo voohimala, wuuluvala woomala; iretta, mikattiyamiho, mixankio soomalamala. Avuwihwe Muluku mukumi!

174 Ti Yoowo Owo onlavul'awe-mo, olelo, Mwan'Awe. "Khalayi Owo aahaalavuliha axitiith'ihu imaara sinci-ene ni inamuna sinci-ene ni moolumo a maprofeta, masi mahiku ala ookiserya ni moolumo a Mwan'Awe, Kristu Yesu." Owo onlavula ni murima wa khula mutthu Owo omwiihanny'awe. Vakhala wira mootoko wona Nsu Nawe wala omwiiwa Owo amanaka vamurimani vanyu, xontte muhikootthe.

Nivekele.

175 Tithi a Wirimu, ohiy'ula, sintteeliw'ahu murima osuwela, mwa okhunla w'Epaphelo ela y'aHeperi, moota Paulo aathikenly'awe arowelaka Ehapari yooreera. Owo khaakhenle eyo vasulu va etthu iiwaly'awe ohimmwa wala vasulu va musuwelelo. Owo aathuna wira nisuwele ele yaari Ekeekhai. Nto owo aarootthika alukamaka Ehapari yooreera, ni owo... aathikenle Waataana Wa Khalayi, Ehapari yooreera awo yaalaleeriw'aya. Nto owo aahoona, mwa Waataana Wa Khalayi iwe, iruku sothene ni ithoonyeryo. Tivo hiyo orin'ahu Eliivuru ila yuulupale y'aHeperi ohiy'ula. Ni hiyo ninnoona Eyo, Pwiya, ni ninniphenta Eyo. Ni woovirani w'okathi, Eyo yaahipahiwa, Eyo yoomwaramwariwa, Eyo eheereriwa ohononasiwa, masi Eyo ennittikinyeya vamosaru. Maana Nyuwu moohimya, "Erimu ni vathi sinoovira, masi Masu Aka khanvira."

¹⁷⁶ Nto ale oowaakanyerya animwiira, “Ahe, muhimmye wira, ‘Paulo t’olempela.” Kahi Paulo, masi Muluku aari mwa Paulo; Ookhala ole mpattuxa aari muhina mwa Paulo.

¹⁷⁷ Siiso ntoko saary’awe mwa Davidi, okathi wiiraly’awe, “Miyoni nkinimuhiya Oowaarya Aka wuntta, nnakhala nkinihiya munep’Awe mookhwaani.” Nto Mwaana a Muluku aahikuxa Masu awo wa profet’owo, nto khurwa mpakha vatthirima va omooroni. Nto khwira, “Mpwanyule emp’ela, Miyoni kinoteka varyari va mahiku mararu.” Nto Owo aahiira, okhala wira Masu a Muluku khanvonya; yoota mmosa khanvonya. Moota onimuxukhuru-ahu Muluku mwaha wa yeela, Urimi Tumimi ula muulupale, ni osuwela wira misuwelelo sahu ohiy’ula, Pwiya, sinniverunya mBibilia mu! Hiyo nooyariwa vasya, nihaana Eroho Yowarya.

¹⁷⁸ Muluku Ootthuneya, akhala mulopwana wala muthiyana mu ohiy’ula, mmiravo wala mwali, ohinatoko okhalela onamoona yeela, yaarowa owerya sayi ohihimuwa vakhala wira kheri-mo Ekumi mme? Oh, awo aniira, “Kookhalana Ekumi.”

¹⁷⁹ Masi Bibilia ohimmye wira, “Muthiyana oniivahererya s’opuha owo ohookhwa hata nlelo akhalaka. Nyuwo muniira wira muhaana Ekumi, masi muhookhwa. Nyuwo munihimya,” ohimmye Bibilia, “wira muhaana Ekumi, masi muhookhwa. Munihimya wira mwa thaaciri khiivo enoohaleelani; masi khamunsuwela wira mootakhaliwa, ni mwa masikhini, ni oohiwar’etthu, ni oohoona, nave khamunsuwela.” Nto owo ti mukhalelo wa ikereja ohiy’ula, Pwiya. Moota anihaleel’aya itthu iya, itthu sa fayita.

Osuwela wira Yehova Muluku, Ole paahi onwerya okumiherya mwa...Owo iirale, “Mukiruuhele ihopa iyo sikhaani.” Owo aahaana okuxa ihopa wira—wira apake etthu ni yeeyo. Ooniheryaka, wira ohihimuwa waahaana okhala etthu, wira wiire etthu ni yoowo. Owo khaapanke ihopa paahi, masi Owo aapanke ihopa sowaapeiwa, ni mukatthe wo wooxiwa. Nto Owo aahaalyiha athu ikonto thanu ni ihopa thanu sikhaani... mikatthe mikhaani ni ihopa piili. O Pwiya, saari mmatatani mw’Awe, ni Owo aari ti Mpattuxa. Masi Owo aahaana okhalana etthu mmatatani mw’Awe.

Muluku, hiyo nihele mmatatani mw’Awe, ohiy’ula, nto niire, “O Muluku, kikuxekeni ntoko siry’aka. Nto emalelo y’ekumi aka yakhala va, mukitthuniherye kirowe ni nrromelo waari mwa miyo, kisuwelaka wira kooyariwa vasya, ni Eroho Anyu yookhalela onamoona ni miyo, ni yookhalela onamoona ni eroho aka, wira miyo ka mwan’Inyu, mulopwana wala mwan’Inyu muthiyana.” Nto nihiku nle nookiserya, Nyuwo munimwaahihimuxa. Munivahe, Tithi.

¹⁸⁰ Nto nuuramme-ene muru, aamukhala mutthu onthhuna ovenxa ntata, wira, “Mukuupuwele, Munna Branham,

mmavekeloni. Kintthuna Muluku akisuwele okathi... kihinatthi okhuma elapo ela ya vathi, wira Owo akisuwelaxe mpakha vanrow'awe wiihana nsina naka. Miyo kinimwaakhula." Apwiya yooreeriheni mwan'aka. Muluku ooreeriheni, ni nyuwo; ni nyuwo, muhano. Mutthu mukina tho? Nvenxe ntata paahi. Mwiire, "Mukivekelele, Munna Branham." Ti yeeyo hiyo enrow'ahu wira. Muluku ooreeriheni, mwamuthiyana. Ti yooreera.

¹⁸¹ Vano, muuramme-ene muru, nvekelaka kinrowa wiipa eversu emosa ya nsipo nla:

Muhinleleke mihakhu sa mulaponi mu,
Sinhononeya naanaanoru,
Mukhalihe miroromelo sanyu mwa itthu
Sihinimala,
Iyo khasinrowa ovira!

Nvarele ntata na Muluku nihinrukunuwa!
Nvarele ntata na Muluku nihinrukunuwa!
Mukhalihe miroromelo sanyu mwa itthu
Sihinimala,
Nvarele ntata na Muluku nihinrukunuwa!

¹⁸² Okathi owo onrumih'awe vano, ni muuramme-ene muru, munoovenxa ntata paahi, mwiire, "Ayo, Pwiya, nla va nawaka"? Enrowa wira exeeni? Enimooniherya wira erooho anyu, mwa nyuwo, ehiira ethanlelo. "Kintthuna ntata Nanyu, Pwiya." Muluku ooreeriheni, mwaaruusi. "Kinoovenxa ntata naka." Muluku ooreeriheni, mwaaruusi, vathi va. Ti yooreera, oophentiwa. Muluku, moosuwela, t'otteeliwa murima owoonani nyuwo wira siiso. "Mwaahiye anamwane erweeke wa Miyo."

¹⁸³ "Kintthuna, Muluku, Nyuwo nvarele ntata naka. Nto nihiku nlo, kintthuna kikhale mmatatani mw'Anyu; wira, Nyuwo mwaihana vale, miyo kirwe." Ayo, ntoko Lasaro saary'awe. Muluku ooreeriheni, munna.

Mukwah'anyu waphiya okhomoni,
Vakhala wira mwaahiroromeleya wa Muluku,
Munookhalana nipuro noowaarya Movuwani,
Munep'anyu wookuxiwa onimoona.

Munrowa wira exeeni, nto?

Nvarele ntata na Muluku nihinrukunuwa!
Nvarele ntata na Muluku nihinrukunuwa!
Mukhalihe miroromelo sanyu mwa itthu
Sihinimala,
Nvarele ntata na Muluku nihinrukunuwa!

¹⁸⁴ Tithi a Wirimu, matata manci-ene aavenxiwa, vamuthukumanoni va mwaamukhaani, ohiy'ula, wira awo anthuna ovarela, ohiy'ula, ntata Nanyu, nihinrukunuwa Noohimala. Esuwelaka wira ele envahereriwa wa Nyuwo...

Nyuwo moohimya, “Miyō... Othene ale Atithi akivahaly’aya animoorwa wa Miyō, ni khaavo hata mmosa a awo onrowa orimeela. Ni Miyō kinimwaahihimuxa nihiku nookiserya. Khankhalakhala epweteyaka, khankhalakhala elamuliwaka, masi aakhalana Ehinimala, Ekumi Ehinimala.” Ni eri Ekumi emosa paahi Ehinimala. Eyo enkhuma wa Muluku, paahi. Ti Muluku. Ni hiyo ninkhala epanthe ya Muluku, siiso tho nikhanly’ahu aana alopwana n’athiyana a Muluku. Nakhalanaru Eroho ya Muluku mwa hiyo, ninuupuwela ntoko Muluku. Ninuupuwela exariya ni owaarya, ni nimphavela okhala wira nimusiveliheke Yoowo.

¹⁸⁵ Munivahe, Pwiya, wira muthinto yoowo w’Ekumi okele mwa khula mutthu ovenxale ntata nawe. Nto ale yaatthuneya ovenxa matata, vano khuhiira, miyo kinvekela wira Nyuwo mukhale ni yaawo. Munivahe, Tithi. Nto mukwaha wamala vale, ekumi yamala, nikele mmuretteleni nihiku nlo, ni Yoowo, weiwo ohinrow’ahu wuuluvala, nnakhala owereiwa, ohinrowa okhala hata mulattu. Mpakha okathi yoowo, munisuke oohakalala ni ootteeliwa murima, nimuttotopelaka Yoowo, maana ninvekela mwa Nsina Nawe. Amen.

¹⁸⁶ Nyuwo othene alipa-oowaamini, vano, nrowe nivenxe matata niipe ekooru ile.

Nvarele ntata na Muluku nihinrukunuwa!
Nvarele ntata na Muluku nihinrukunuwa!
Mukhalihe miroromelo sanyu mwa itthu
Sihinimala,
Nvarele ntata na Muluku nihinrukunuwa!

¹⁸⁷ Vano nrowe niipeke vathi-vathi. Mwiiraka siiso, namwaattamanani anyu, mwiire, “Muluku ooreeriheni, namwaattamanani.” Nvahane matata ni mutthu okilanth vakhiviru ni nyuwo. “Muluku ooreeriheni.” Ipantte soopiili vano. Ipantte soopiili, nvahane matata. “Muluku ooreeriheni, namwaattamanani. Muluku akhale ni nyuwo.” “Mukhalihe miroromelo sanyu mwa itthu Sihinimala.”

Doc, koosuwela wira eri vaavo, munna. Koosuwela wira munkhalaka weiwe, Munna Neville, okathi munci-ene ovinre.

Mukwaha anyu wamala,
Enoorowa wiiraneya, nimoso wa mahiku awo.
Nakhala oororomeleya wa Muluku,
Ninoomona Munna Seward Iwe.
Etthoko anyu yoowaaryexa Movuwani,
Munep’anyu wookuxiwa onimoona.
Nvarele ntata na Muluku nihinrukunuwa!
Okisivela okokhorela iwo, numala mutthaka.

Nvarele ntata na Muluku nihinrukunuwa!
 Mukhalihe miroromelo sanyu mwa itthu
 Sihinimala,
 Nvarele ntata na Muluku nihinrukunuwa!
 Okathi onoorukunuwa voochilekela,
 Khiivo mulaponi enrowa ohala,
 Mukhalihe miroromelo sanyu mwa itthu
 Sihinimala,
 Nvarele. . .

Nrowe nimuwehe Yoowo, Ole ohinooneya eriyari ahu, ni
 nimukokhorele Yoowo paahi vano niipaka.

Nvarele ntata na Muluku nihinrukunuwa!
 Nvarele ntata na Muluku nihinrukunuwa!
 Mukhalihe miroromelo sanyu mwa itthu
 Sihinimala,
 Nvarele ntata na Muluku nihinrukunuwa!
 Murettele! Murettele! Murettele wooreerexa,

Mmukokhorele Yoowo vano.

Orwaaka. . .

Mutthaka woomala. Nno okokhorela.

Mponowele erooho ahu voohimala,
 kinnivekela,
 Mmawimpini wa ophenta ohinthokoseya.

Murape mwa Yoowo paahi.

Murettele! Murettele! Murettele wooreerexa,
 Onrwa okhuma. . .

Ephattuwelo ele yuulupale, Eyo ti yoothukuwa.

. . . osulu;
 Mponowele erooho ahu voohimala,
 kinnivekela,
 Mmawimpini wa ophenta ohinthokoseya.

Eyo kheniira etthu?

. . . Murettele wooreerexa,
 Onkhuma w'Atith'ihu Osulu;
 Mponowele erooho ahu voohimala,
 kinnivekela,
 Mmawimpini wa ophenta ohinthokoseya.

Khiivo etthu ya Yeeyo, eri yoowaatta ni yoosiva?

¹⁸⁸ Kinniikoha vakhala wira ookhala mutthu onweriwa
 onthuna ottikitthelihiwa makhura ni ovekeleliwa. Akhala vale,
 mphwanye opuro anyu. Ola muhano vakhaterani va iroota vale?
 Mmuhiye ahale. Kinimoorwa, onvekelela. Khorina yo ovenya
 vakhaterani. Mukina?

Oh, khonoosivelani epantt'ila ya muteko wo okokhorela? Akavi anoona, answela tu wira Mukhalelo wa Muluku ori vaava? Ti yeeyo enihimy'aka. Emosaru yeeyo... Nyuwo munimoona paahi... Akavi anoona ntoko yaaniwerya okhuwela? Vano nrowe noone. Enkhala ntoko wira etthu mwa nyuwo entthuna okhuwela. Munnona?

Owo murettele! Murettele! Murettele
wooreerexa,
Onkhuma w'Atithi Osulu;
Mponowele erooho aka voohimala,
kinnivekela,
Mmawimpini mwa ophenta ohinthokoseya.

Waarye mwa miyo,

¹⁸⁹ Nlelo nikokhorelaka, ninrowa waattikitthela makhura aretta vano, nto naavekelele. Khamunthuna orwa epantt'ila, muhano?

¹⁹⁰ Ela enihimya exeeni? "Ovekela wo waamini onoomoopola muretta." Atthu othene evekeleke vano, mwiipe vathi-vathi paahi nsipo nlo. Mmuupuwele Yesu aavonihaka aretta.

Omuttikitthela makhura...?...



AHEPERI, EKAPITULU YOOPACERYA EMK57-0821

(Hebrews, Chapter One)

ITTHARANELO YA ELIIVURU YA AHEPERI

Mutthak'ola wa Munna William Marrion Branham, opaceryawene olaleeriwe ni Enkelesi Namararu ohiyu, mahiku yeettaka 21 mweeri w'Agosto, 1957, oBranham Tabernacle oJeffersonville, Indiana, wAmerika, okuxiwe wo okaravariwa mufitani ya makineti khulempwa wothene ni nttaava n'Enkelesi. Otaphuleliwa nno mw'Emakhuwani okhumiheriwe ni okaiwe ni Voice Of God Recordings.

EMAKHUWA

©2022 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Olopolo mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitemihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyiwe musurukhu vahikhanle n'utthuniheriwa woolempwa ni Voice Of God Recordings®.

Mwaaphavelaka wiiwa-tho wala ikaruma sikina sikhanelle, xontte mulavule ni:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org